

Wakita á WAHAYU Á YUHANNA

Názu á fantau an ñane Yuhanna

¹ Wakita na wá, á mara názena Yaisu *Almasiihu á kátá marateranse ge emnde a slera á Dadaamiya. Ge ñane keni a vantaa ba Dadaamiya duksa ñanna ge se marateránmárá, ganakini a njarka an kaltádfa názena watse ba jirire á de magava á katafke na. Daaci Yaisu Almasiihu a naba ðelive malika-aara ge iya Yuhanna sleslera-aara, a se marisaa ñane nasherire á duksa-aha ñanna baðemme.

² Duwa-aaruwa ge iya keni, ya ndaterhe názena ya naana ya na baðemme ge emnde, ya ðalese geni una ñanna elva á Dadaamiya, a ndaasa ba Yaisu Almasiihu an ire-aara, baðemme á duksa-aha ñanna ba jirire.

³ Barka ge edda una má ańkwa ndaha wakita á elva ñanna a sawa áza Dadaamiya na; barka ge emnde na tá ańkwa cena elva ñanna keni, tá ámberá fansaarefe na keni. Adaba herzhap-teherzhe sarte na watse á magava duksa-aha ñanna baðemme átekwa na.

Use á Yuhanna ge aiklaisiya-aha am ekse-aha gergere vuye

⁴ Ba iya Yuhanna ñanna zlaðe áðaliye una keni, yá puwakurte use-aaruwa ge kure aiklaisiya-aha na kwá am ekse-aha gergere vuye am larde á Aziya na. A magakurnaamaga

Dadaamiya ngurna, a vakurteva hairire. Ba nane Dadaamiya am fakta keni ndza anƙwa, kina keni á ba anƙwa, watse á sawa keni ba nane na. Tara Shedekwe-aha-aara na ta vuye a bazlateraa nane á katafke-aara am kurshi á sleksire-aara na,

⁵ antara Yaisu *Almasiihu na nane sleseyde á jirire, nane gevge ba seke makaji ge tsete am fáyá, slekse arge slekse-aha keni bademme na, a magarakurnaamaga ba itare ngurna, a varakurteva hairire keni.

Yaisu Almasiihu wá, wayamitewáyá ge miya, a naba yaa shifa-aara, a n̄ezlesaa miya am haypa an uzhe-aara.

⁶ Zlabe ádaliye, a vamite njá antara nane am sleksire-aara, ira a vamite limanire ge mága slera á Eddeɗara Dadaamiya. Sey emnde bademme a demaranvedeme, a galargála ba nane palle dem ba ge d̄ekid̄eki. *Aamin!

⁷ N̄ane wá, kwaye nane anƙwa á sawa antara kumba, bademme á emnde watse tá nanna, antara ba emnde na ndza ta n̄gyanse upa am nane na keni, watse tá nanna. Emnde a jeba na tá áte duniya na bademme watse tá kyuwa, tá tsaka d̄ákwa má watse á sawa nane. Una ba jirire watse á de magava ba estuwa. *Aamin!

⁸ Á bá Dadaamiya Yaakadada: «Ba iya una ya zun̄we arge duksa-aha bademme, watse ba iya n̄anna zlabe ádaliye am halawuwa á duksa-aha bademme.» Ba nane una kwaye am fantaufe keni kerten̄ ndza anƙwa, anƙwa vatená, á katafke keni watse á sawa ba nane n̄anna, bademme á sleksire á ba am erva-aara palle.

*Marápsémáre Yaisu *Almasiihu am ice á Yuhanna*

⁹ Yá anjwa puwakuránta ba iya una keni, ya egdza emmekure Yuhanna. Iya antara kure ma ba palle, gamiyevge palle antara Yaisu *Almasiihu. Iya keni yá anjwa shá zlada ba seke kure. Daaci estuwa, farvaunđe á miya antara kure ba palle. Náza-aaruwa wá, ta eksivahe, náwa ta se eblyiya am dagave á háye áte wa na tá dahaná an Patmaus na. Ta bantsa ya magaa shagerkire adaba yá ndater elva á Dadaamiya, antara labare á Yaisu ge emnde. Daaci ma ba palle antara kure am sleksire-aara kina.

¹⁰ Vacite nanna an kwaskwe á Yaakadada wá, a naba eksite ge Shedekwe Cudedde, daaci yá cena ba kwára umele á hula am iga-aaruwa an ndzedá jipu ba seke hula á derkwákwa.

¹¹ A biyantsa kwára nanna wá: «Puwetepuwa názena ká naaná ka na bademme áte nalmesh-eri, velatertevela ge aiklaisiya-aha na tá am ekse-aha gergere vuye na.» A ba nane wá: «Velatertevela ge emnde na tá am Aifaisus, ge emnde na tá am Samirna, ge emnde na tá am Pairgamus, ge emnde na tá am Tiyatira, ge emnde na tá am Sardis, ge emnde na tá am Filadailfiya, antara emnde na tá am Lawdikiya bademme.»

¹² Ya naba eptsapte ge zhara edda una á ndahi elva nanna, ware nane edda-aara? Ya naa ba duksa-aha na tá bazla kára á fanus-aha átekwa na vuye kalkale ta maganaa an dindar.

¹³ Zlabe adaliye, ya naa duksa ba seke urimagwe, á tse am dagave á duksa-aha nanna,

an tsekwa am nanɣyuwe sladɔde de ba áte iga á sera-aara, a ɳɔdese uksuwe an párapara ta maganaa an dindar ɳane keni.

¹⁴ Úgje á ire-aara dzayye ba telle jauje ba ge sluzhe keni, ice-aha-aara tá mbe á ba an mbe ba seke nara á kára.

¹⁵ Sera-aha-aara ba seke ire na má ta devese am egzla ba kyanɳe. Kwára-aara ge ɳane ba seke hula á yawe má á degeza áte guwa yaikke.

¹⁶ A ɳaa terlyakwa-aha vuye am nadafa-aara. Katsakar an gá sláre we bukerde anɳwa á segashe am mbuwe-aara, wafka-aara á mbe ba pelpele ba seke kára á vaciya átire.

¹⁷ Iya ba yá puwete ice-aaruwa áte ɳane wá, kreppe ya mbedehe am sera-aara, ganevge ba seke una ni baaka shifa am iya na. Daaci a naba fetaa ba ɳane ɳanna nadafa-aara áte iya: «A waɳka lyawa,» á bina á elvan ge iya. «Degiya ba iya edda una ya zunɳwe ba iya arge duksa bademme, am halavuwa á duksa bademme keni watse ba iya ɳanna,» á bina.

¹⁸ «Ba iya edda una yá njá an shifa dem ba ge dekideki, ndza emtsanemtsa, amá náwa ya tsanetse am fáya, yá njá an shifa ba ge dekideki, ba iya una yá an egdza a tsekweram á fáya ɳanna bademme.

¹⁹ Daaci puwetepuwa názena ká nanna kina, názena anɳwa á magava, antara una watse á de magava á katafke na bademme.

²⁰ Náwa nasherire buwa yá ndaksa ya: Terlyakwa vuye na ká anɳwa zharaná am nadafa-aaruwa na wá, tá mara malika-aha vuye áte aiklaisiya-aha vuye na. Duksa vuye na ta

maganaa an dindar ge ɓazla kára á fanus-aha átekwa na maa, itare tá mara aiklaisiya-aha vuye ɲanna.»

2

Elva na á velaná Yaisu á dem Aiklaisiya á Aifaisus

¹ Puwetepuwa elva na, velantevela ge Malika á aiklaisiya á Aifaisus: Banánba wá: Náwa názena á ndaaka edda una a ɲanaa ɲane terlyakwa vuye am naɗafa-aara na. ɲane á ja dába am dagave á duksa vuye na ta maganaa an dindar ge ɓazla kára á fanus-aha átekwa na. A ba ɲane wá:

² Diyandiya slera á ɲa baɗemme, diyandiya wáva á ɲa, antara duksa na ká aɲkwa ɓashaná ka baɗemme. Diyandiya ganakini ekka ká taa vaterteka baráma ge emnde a mága emtaɲkire. Emnde na ta bantsa itare ta emnde a bela-aaruwa mbate keni fida, ka habezesa ka názu am hala-aatare, ka naba shantauhe ganakini ta emnde a fida, una ɲanna keni diyandiya ya baɗemme.

³ Kwaye ɲane duksa na ká ɓashaná ka aɗaba iya, aley gazlanƙa ɗekideki.

⁴ Amá aɲkwa duksa palle ka badzanva ka: Ekka yakiyaaya, wayakika mázla-aara seke una ndza ka wayiyya am zuɲɲwire na.

⁵ Eddzama emtsaade ba shagera áte njá á ɲa am fantaufe, diyeddiye ba ka ma ka mbaɗe am sarte-ara keni. Eptseptsá am tuba, fantaufe zlaɓe ádaliye ba seke una ndza ka maganaa am fantaufe na. Máki eptaɲka am tuba, náwa yá

aṅkwa duwa á dezeṅa, yá de jánaaja tate á fá kárá á fanus á ṅa am slede-aara.

⁶ Amá náwa názu á kaku yawe cekwa: Adaba ekka keni yakanaaya názena tá maganá emnde á Nikaulas ba seke una ya yanaa ya.

⁷ Kwaya ṅane názena á baterná Shedefkwe Cufedde ge aiklaisiya-aha á Dadaamiya. Edda una aṅkwa hyema-aara a cenevaacena. Ge emnde na má garega ndzedá, yá de vaterta za egdza á náfá á shifa na am zlanna á Dadaamiya na ge itare.

Elva na á velaná Yaisu á dem Aiklaisiya á Samirna

⁸ Puwetepuwa elva na, velantevela ge Malika á aiklaisiya á Samirna. Banánba wá: Náwa názena á ndaaka edda una zuṅṅwe ba ṅane arge duksa bademme, am halavuwa á duksa bademme keni ba ṅane ṅanna, ndza emtsamta, amá tsetse am fáyá na. A ba ṅane wá:

⁹ Diyandiya zlada á ṅa bademme, diyandiya talagire na a shaa ka na, amá berbire á jirire keni tá ndavaná á ba ázeṅa. Diyandiya emtaṅkire na tá tsakaná Yahudiya-aha áte ka na bademme. Ta bantsa ta Yahudiya-aha, amá ta Yahudiya-aha á ba áte we, itare ta emnde á Shaitaine.

¹⁰ Herzhapteherzhe zlada á kure ge kure, kwaye watse Shaitaine á de ndzedá arge kure, á de puwa emnde umele am dagave á kure á dem daṅgay, amá gazlauka dekideki. Náwa watse kwá de ná zlada am hare kelaawa, ma gevge áte emtsa keni tsawatse ba shagera. Yá de vakurte lada á kure, lada ṅanna wá, shifa.

¹¹ Kwaya ɲane názena á baterná Shedefekwe Cufedfe ge aiklaisiya-aha á Dadaamiya. Edda una aɲkwa hyema-aara a cenevaacena. Ge emnde má garega ndzedá, itare á de shaterka emtsa na watse á ceɓa emnde ge buwire na.

Elva na á velaná Yaisu á dem Aiklaisiya á Pairgamus

¹² Puwetepuwa elva na, velantevela ge Malika á aiklaisiya á Pairgamus: Banánba wá: Náwa elva na á ndaaka edda una an katsakar an gá slare we bukerde na: A ba ɲane wá:

¹³ Diyandiya ekse á ɲa, diyandiya ganakini ká ba am tate na ni á njá amkwa Shaitaine an sleksire-aara na. Ta jaa shifa á Antipas á ba am dagave á kure adaba ɲane á ndater elva-aaruwa ge emnde, kezlanveka fetarfire-aara áte iya defideki. Ta janaa á ba am dagave á kure ekse á Shaitaine ɲanna, aley baaka názu a eksanaa una ɲanna áte kure, fetarfire á kure áte iya ba kelaara.

¹⁴ Amá náwa názu ka badzanva ka: Ekka ka puwa emnde a daba názena ndza a kwaratersaa *Balaama ge emnde am mba á ɲa. Adaba Balaama, ndza a kwaransaa ɲane pute á mbedá *Iserayiila-aha á dem haypa ge sleksu *Balak. Ndza ta vaterta estuwa ektápaare ge Iserayiila-aha geni a zaruze hyuwa á mága hele, antara mága zawarire.

¹⁵ Daaci ekka ká an emnde a mága ba jeba á una ɲanna zlaɓe adaliye am mba á ɲa. Tá aɲkwa magava an názena ta mbatersaa emnde a Nikaulas ge emnde na.

16 Ay degiya eptseptsá am tuba. Máki ká eptseka am tuba, ba kinamina náwa yá duwa an katsakar na á segashe am mbuwe-aaruwa na, yá de wava an emnde ñanna.

17 Kwaya ñane názu á baterná Shedefkwe Cufedfe ge aiklasiya-aha á Dadaamiya. Edda una aṅkwa hyema-aara a cenevaacena. Ge emnde na má garega ndzedá, yá de vaterte dáfá á samaya. Dáfá na, tá taa diseka emndimag-waha, yá de vaterta antara nákwá dzayye, an puwa zhera átekwa, tá taa diseka emnde umele defekideki, sey ba edda una nákwá ñanna am erva-aara.

Elva na á velaná Yaisu á dem Aiklasiya á Tiyatira

18 Puwetepuwa elva na, velantevela ge Malika á aiklasiya á Tiyatira. Banánba wá: Náwa elva na ni á ndaaka *Egdza á Dadaamiya na. Ice-aha-aara ge ñane tá mbe á ba an mbe ba seke nara á kárá, sera-aha-aara keni ba seke íre na ta devese am egzla kyanṅe na. A ba ñane wá:

19 Diyandiya slera á ña bademme, wáyáva á ña, antara fetarfire á ña, farvaunde á ña am duksa, ira maggwire á ña. Diyandiya ganakini ká aṅkwa wálá am duksa bademme jakuje ge una am fantaufe.

20 Amá náwa názu ka badzanva ka: Ekka, ka yanaa baráma ge Ijabail, mukse na a bantsa ñane, ñane nabi, mbate aṅkwa á mbaḍa emnde a slera-aaruwa á dem zawarire, antara za hyuwa á mága hele.

21 Ya vante sarte ganakini a eptseptsá am tuba, amá wayaaka, ñane á maga ba zawarire-aara.

²² A njinja ñane, sey yá zlavanaazlava á dem áhá, watse á tapánaatápa ba ñane áte vuwa-aara. Zala-aha-aara na ta magaa zawarire kerde na keni, diyandiya iya zladá na yá de faterarfe na. Sey máki eptsareptsá am tuba, yaránya mágava an mukse ñanna ba dekideki.

²³ Bademme á egdzara á mukse ñanna, sey yá cebaterceba. Tá de diyeddiye á ba áte una ñanna aiklaisiya-aha, ganakini diyandiya ya názu am hude á emnde bademme, antara názena tá kataná itare na bademme. Ekkure bademme á kure na watse yá pelakursepele, ma ware keni á ba áte slera na ndza a maganaa edda-aara na.

²⁴ Amá kure emnde na d'abakurka shagerkire na ta bantsa itare nasherire á Shaitaine, tsahakurka na wá, shagera slera á kure, yá faku-raareka duksa umele mázle-aara ge kure.

²⁵ Amá duksa palle wá, ba tsawátse á ba áte názena ni kwa disa kure kina na, dem sarte na ni má watse sanaasa ya na.

²⁶ Ge emnde na má garega ndzedá dem halavuwa-aara, yá de vaterte hakuma, tá de kwaráná ba itare emnde na fartareka áte iya na bademme.

²⁷ Ge itare keni yá de vaterte ba hakuma na ndza a vita Edderwa ge iya na. Daaci tá de maganá ba itare hakuma áte emnde ñanna an zade á íre, tá de ñgerd'atern'gerdá ba seke má tá kyaba emgyegwe a gahe-aha.

²⁸ Zlabe ádaliye, yá de vaterta antara terlyakwa á ireñlya.

²⁹ Kwaya ñane názena á baterná Shedefkwe Cufedde ge aiklaisiya-aha á Dadaamiya, edda

una anƙwa hyema-aara, a cenevaacena.

3

Elva na á velaná Yaisu á dem Aiklaisiya á Sardis

¹ Puwetepuwa elva na, velantevela ge Malika á aiklaisiya á Sardis. Banánba wá: Náwa elva na á ndaaka ba edda una Shedekwe-aha á Dadaamiya vuye, antara terlyakwa vuye am erva-aara na. A ba nane wá: Iya diyandiya mága á n̄a baɗemme. Emnde tá zleba ba ka geni njaktenja áte shifa, mbate baaka shifa am ka.

² Tsetse am hare, farefe ge ndzedá á n̄a, amá má fakareka, ká de emtsa. Adaba ya naa slera á n̄a zlaɓe hyefka ba názara keni áza Dadaamiya.

³ Yeheteyeha názena ndza ka cenanaa ka am fantaufe, antara názena ndza ka shanaa ka áza Dadaamiya. Eptseptsá am tuba, fansaarefe ge Dadaamiya. Máki ká tseka am hare, náwa yá anƙwa duwa an ila ba seke neyle, ká taa diseka sarte n̄anna dekideki.

⁴ Emnde na itare nyamalaranveka zane-aha-aatare, amaana: Cuɗeɗe ervaunɗe-aatare na keni, diyanaterdiya ya am dagave á kure, amá wá, ta cekwa. Itare maa, yá de vaterte zane dzayye, watse n̄a de njá kerɗe adaba hyarephye.

⁵ Baɗemme na má garega ndzedá, názu yá de vaterte ge itare wá, yá de tsekwatema am zane dzayye, yá de badzeka zhera-aha-aatare am wakita na an puwa zhera-aha á emnde na tá an shifa na. Iyau yá buweka zhera-aha-aatare á katafke á tara Edderwa antara malika-aha-aara geni ta emnde-aaruwire.

⁶ Kwaya ɲane názena á baterná Shedefekwe Cufedfe ge aiklasiya-aha á Dadaamiya. Edda una anƙwa hyema-aara, a cenevaacena.

Elva na á velaná Yaisu á dem Aiklasiya á Filadailfiya

⁷ Puwetepuwa elva na, velantevela ge Malika á aiklasiya á Filadailfiya. Banánba wá: Náwa elva na á ndaaka edda una cufedfe, edda á jirire na: Á ɲáná ba ɲane egdza a tsekweram á sleksire á Dadaamiya. Má a werantaa ba ɲane, baaka ura á dzegwándzegwa hefanuhede. Má a zleɲetaa ba ɲane, baaka ura á dzegwándzegwa werantuwera. A ba ɲane wá:

⁸ Diyandiya slera á ɲa, diyandiya ganakini cekwa ndzedá á ɲa, amá magakanaamaga názu ya ndanaa ya, yakika ɗekideki. Ya werakantaa ba iya wákyiya, baaka edda una á zleɲakvezleɲa.

⁹ Ká cenáncena emtu? Náwa názu watse yá de magaterná ya ge emnde na ta bántsa itare ta Yahudiya-aha, mbate ta Yahudiya-aha á ba áte we na: Sey yá de satersá á sem sera á ɲa, tá de diyeddiye ganakini wayanak-wáyire.

¹⁰ Ba seke una ni ekka ka tsufete elva-aaruwa, fakisaarefe na wá, iya keni sey yá tsufaktsufa am laruwa na watse á setarge emnde bademme am duniya ge dise názu am itare na. Á de shanƙa zladá-aha ɲanna ɗekideki ge ekka.

¹¹ Náwa iya, watse yá eptsa ba herzhe, tsaatse ba shagera áte názena ka shanaa ka kina, ganakini ká keƙanaaka názena watse tá de faƙakse ire an ɲane na.

¹² Ge emnde na má ta ganaa itare midalire, itare yá de gatervege ba seke ta kawe-aha am mashidi á Dadaamiya-aaruwa, baaka názu á de kabalaterkáβala dekiŋeki. Watse yá puwete zhera á Dadaamiya-aaruwa, antara zhera á berni á Dadaamiya áte itare. Berni ŋanna, Urusaliima áŋwaslire na watse á de tsekwa á sawa áza Dadaamiya am samaya. Zlabe adaliye, yá de puwete zhera-aaruwa na watse áŋwaslire na áte itare.

¹³ Kwaya ŋane názena á baterna Shedekwe Cudede ge aiklaisiya-aha á Dadaamiya. Edda una aŋkwa hyema-aara, a cenevaacena.

Elva na á velaná Yaisu á dem Aiklaisiya á Lawdikiya

¹⁴ Puwetepuwa elva na, velantevela ge Malika á aiklaisiya á Lawdikiya. Banánba wá: Náwa elva na á ndaaka edda una zhera-aara *Aamin, amaana: Edda una ŋane sleseyde á jirire, baaka fida ázeŋara dekiŋeki na. Baŋemme á názena a nderanaa Dadaamiya, a nderanaa áte erva an ŋane. A ba ŋane wá:

¹⁵ Iya diyanakdiya baŋemme. Ekka, ka ba seke yáwe na a váha áte vaciya, gevka yáwe lailaidde, gevka yáwe á mbera, ura á taa ŋanaaka am mbuwe na. Iya wayanka jeba á una ŋanna dekiŋeki, ya háyá ba ka eksese baráma palle.

¹⁶ Am ka ba seke yáwe na a váha áte vaciya, gakefka seke yáwe lailaidde, gakefka seke yáwe á mbera tsawe wá, sey ba yá puwakpuwa am mbuwe-aaruwa.

¹⁷ Ekka, ka bántsa ka edda berba, baaka názu á jakviyaaja dekideki. Ay degiya ba diŋkire ka wá, ká am kataliya ba ka am emnde, hyakephye ge zagvaareze, ka talága am emnde, ká an ukhyiye dey, ka wulfe zlaɓe ádaliye.

¹⁸ Sawari na yá vaktá ya wá, sawa shekwepshekwe dindar na an bára, á maga wulwulire jipu na ázerwa, watse ká gegga rezegire á jirire. Sawa shekwepshekwe nanɣyuwe dzayye ázerwa ge sheɓa nasherire á ŋa, antara kurgune á ice ganakini ká nanna ice.

¹⁹ Iya wá, yá valateraare ge emnde na wayanaterwáyá na, yá giyatergiya. Adaba una ŋanna, magauka gaagusa an elva-aaruwa na, eptsauptsa am tuba, eksawanteksa baráma-aaruwa palle.

²⁰ Cenausena: Iya wá, náwa ya ba seke edda una á gá use áte we á wákyiya, ma ware keni má cenáncena kwára-aaruwa, a se weritaa wákyiya na, yá demda antara ŋane, yá de njá antara ŋane, ŋá de za duksa kerde.

²¹ Ge emnde na má garega ndzedɓa, watse yá vaterta baráma ge se nja antara ya am sleksire-aaruwa, ba seke una ni ndza ya ganaa iya midalire, iya keni náwa ŋá antara Edderwa am sleksire-aara na.

²² Kwaya ŋane názena á baterná Shedefkwe Cufedde ge aiklaisiya-aha á Dadaamiya. Edda una anƙwa hyema-aara a cenevaacena.

4

Gálá Dadaamiya na tá galáná am Samaya na

¹ Am iga á una-aha ṅanna maa, ya keta ice-aaruwa wá, ya naa ba wakyyiya an wacene wanṅe am samaya. Daaci yá cena ba kwárá á edda una ndza a biya elva na, kwárá-aara á zlala jipu ba seke hula á derkwákwa: Eḏḏala ásezerwa áhuna, náwa yá se maraká názu watse á de magava á katafke, a ba ṅane á elvan ge iya.

² Kertenṅ a eksitehe ge Sheḏfekwe Cufedḏe, daaci yá zhara ba kurshi á sleksire am ice-aaruwa, anṅkwa ura á njá am kurshi ṅanna.

³ Edda una á njá am kurshi ṅanna zariya-aara ba seke uwe, wafke-aara á maga wulwulire ba seke nákwá-aha umele tá ḏahaterá an Yaspá, umele tá ḏahaná an Sardisa na. A jantaave kataliyavere ge kurshi á sleksire ṅanna ta takarre zariya jipu. Zariyire-aara ba seke jeba á nákwá umele zlaḓe áḏaliye tá ḏahaná an Imiradi.

⁴ Kurshi-aha á sleksire umele kul buwa ju ufade a jantaave ge slekse yaikke na á njá am kurshi na, emgyegwar zala keni ta kul buwa ju ufade tá njanja am kurshi-aha ṅanna, tá tsákwá am zane dzay-dzayye baḏemme, tá an dzákwa á sleksire, ta maganaa an dindar baḏemme am ire-aha-aatare.

⁵ Daaci á sa am huḏe á kurshi á sleksire na yaikke na wá, á segashe ba kárá á ráde, antara kwárá á duksa umele ba tsekemme, ira vála á samaya. Zlaḓe áḏaliye, a mbetehe kárá-aha vuye á katafke á kurshi á sleksire ṅanna. Una-aha ṅanna wá, ta Sheḏfekwe-aha á Dadaamiya ta vuye.

⁶ Á ba á katafke á slekse yaikke ṅanna wá,

ndza anƙwa duksa umele á maga wulwule ba seke kweteram. Tá anƙwa duksa-aha umele zlaɓe ádaliye ta ufaɗe káلكale tá an shifa, ta fem slekse yaikke ɲanna am dáɡave. Wafke-aatare, antara iga-aatare baɗemme an cepa ba ice áte duksa-aha ɲanna.

⁷ Zuɲɲwire á duksa-aha ɲanna á gáráva an ervare; buwire-aatare á gáráva an egdza a dalau; keyire á duksa-aha ɲanna, wafke-aara ba seke wafke á urimagwe. Ufaɗire-aatare á gáráva an zeɓe, ɲane á ɲgye an lyákwá.

⁸ Duksa-aha ɲanna ta ufaɗe an shifa na, tá an lyambake unƙwahe unƙwahe áte itare, an cepa ba ice áte duksa-aha ɲanna, áte iga, antara á kya huɗe keni baɗemme. An vayi vacika tá bela ba lahe. A ba itare am lahe-aatare:

Ekka Dadaamiya Yaakadada wá, ka cuɗeɗɗe, ka cuɗeɗɗe, ka cuɗeɗɗe, ba ka palle baaka umele. Ka edda á hakuma ba ka palle, ware umele. Kwaye am fakta keni ndza ba ekka, vatena keni ba ekka, á katafke keni ká sawa ba ka ɲanna.

⁹ Estuwa á ba lahe á duksa-aha ɲanna ta gergere ufaɗe na. Edda una á njá am kurshi á sleksire, á njá an shifa ba ge ɗekideki na, tá anƙwa eɗɗema, tá anƙwa slafaná we baɗemme.

¹⁰ Ba kelaa má itare tá anƙwa maganá una ɲanna ge edda una an kurshi á sleksire na wá, emgyegwar zala kul buwa ju ufaɗe na keni baɗemme tá puwa dzákwa á malire-aatare na á dete haha, á katafke á slekse yaikke na am kurshi ta jantaave itare na, tá anƙwa kezlan ugje, tá baná:

11 Yaakadada á ñere, Dadaamiya á ñere, ba ekka palle una ka edda á hakuma, hyakephye geni tá galakgálá emnde bademme, geni tá demakdema emnde bademme, geni tá faksaarefe emnde bademme. Adaba duksa bademme ka nderanaa ba ka, an namaari á ña ka nderateraahe, ka njateraahe.

5

Tá anƙwa gálá edda una ba seke egdza zhel kyáwe a sadake na

¹ Daaci ya naa wakita an fádá, am nadafa á edda una á njá am kurshi yaikke na, anƙwa an puwa duksa am wakita ñanna, áte iga, antara am huđe bademme. Ta fafete dámshe á vadale ser vuye áte we á wakita ñanna, ganakini a waranteka ura umele.

² Zlaŕe ádaliye, ya naa gwarda á malika, á ndaha elva á ba an ká kwára, a ba ñane wá: «Áma edda una hyephye ge wára wakita na náwa ta hadante, ta fafete dámshe átekwa na?»

³ Amá jarka ba palle keni edda una hyephye đekideki. Ma am huđe á samaya, ma áte duniya, ma huđe á haha keni, jarka đekideki edda una hyephye ge wera wakita ñanna, ge á zharanaazhára názu an puwa am wakita ñanna.

⁴ Iya ba ya cenaa una ñanna wá, ya fantau ge kyuwa.

⁵ «Kyuweka,» a ba palle á emgyegwar zála kul buwa ju ufađe na á elvan ge iya. «Ezzhára ka ba ervare na ta yanaa emnde á Yahuda, ta emnde a jeba á sleksu *Dawuda na,» á bina. «Ŋane gaage

ndzedfa áte duksa bademme, ñane hyephye ganakini á fáyá dámshe á vadale ñanna, ñane hyephye ge wára huđe á wakita ñanna,» á bina.

⁶ Daaci yá zhára ba egdza zhel kyáwe, á tse am dagave á tara slekse yaikke, antara duksa-aha ufade na tá an shifa am vuwa na, ta jatertaave emgyegwar zála kul buwa ju ufade na. Zhel kyáwe ñanna, á gáráva an egdza zhel kyáwe na ndza ta iceta sadake-aara na. Ñane wá, an derma vuye, ice-aha-aara keni vuye am ire. Ice-aha-aara vuye ñanna wá, ta shedekwe-aha na ta vuye á katafke á Dadaamiya, á beláterá á sem duniya bademme na.

⁷ Daaci a duhe ge egdza zhel kyáwe ñanna, a de lyevaa wakita na am nadafa á slekse yaikke na.

⁸ Ba ñane lyevaalya wakita ñanna am eravaara wá, duksa-aha ufade na tá an shifa am vuwa na, antara emgyegwar zála kul buwa ju ufade na bademme garaavege á dem áhá, tá kezlan ugje á katafke-aara. Itare bademme tá á ba an gadzavera-aha-aatare am erava, antara egdzara erba-aha á dindar-aatare zarizariya ba seke uwe, an naha an kajijji am huđe-aara bademme. Kajijji ñanna wá, maduwa-aha á emnde a fetarfe na tá maganá ádeza Dadaamiya na.

⁹ Tá anjwa belá ba láhe-aatare anjwaslire, ta bantsa itare:

Ba ekka una hyakephye ge lyiya wakita na, hyakephye ge wára wakita na. Adaba ekka ndza ta jaka adaba emnde, ekka ka varese emnde an uzhe á ña. Ka varanse emnde a jeba gergere ge Dadaamiya,

emnde a ndaha elva-aha gergere, emnde a larde-aha gergere, ka sateraahe ásezenjara.

¹⁰ Ka gatervaa ba ekka ganakini a njarinja antara ka am sleksire á ña. Ka gaterve *liman-aha ge mága slera á Dadaamiya á miya, watse tá de kwaráná itare duniya.

¹¹ Daaci yá zhárá ba malika-aha ta kwákya jipu, baaka kezlakula-aatare ðekideki, ta ba seke iwe á waya, ta jatertaave itare ge tara slekse yaikke am kurshi na, antara duksa-aha ufade na tá an shifa na, ira emgyegwar zála kul buwa ju ufade na bademme.

¹² Tá belá láhe an ndzedfa-aatare bademme, a ba láhe-aatare:

Ekka, ka edda una ndza ta icaktiya ba seke zhel kyáwe á sadake na. Bademme á hákuma á ba am erva á ña. Bademme á duksa á ba am erva á ña. Ka edda á ilmu, ka edda á ndzedfa, hyakephye ge tá galakgálá emnde, ge tá zlebagzleba emnde bademme.

¹³ Zlabe ádaliye yá cená ba tá belá láhe duksa-aha na a nderanaa Dadaamiya bademme. Kazlaja na am samaya, una áte haha, una am huðe á haha, una an háye, bademme á názena a nderanaa Dadaamiya. A ba láhe-aatare:

Galaumigálá edda una am kurshi á sleksire na, antara edda una a gev ba seke egdza zhel kyáwe á sadake na. Ta emnde a dárádza ba itare, tá an ðemðemire, hákuma bademme á ba am erva-aatare. Galaumigálá ba itare, dem ba ge ðekideki.

14 *Aamin, a ba duksa-aha ufade na tá an shifa na. Tepekke, á ba emgyegwar zála kul buwa ju ufade na keni á dem áhá, tá kezlater ugje ge tara slekse yaikke, antara egdza zhel kyáwe na.

6

Egdza zhel kyáwe á wára dámshe-aha na vuye na

¹ Daaci yá zhára edda una tá dahána an egdza zhel kyáwe na, a fantau ge wera wakita na am erva-aara na. Ba a weraa dámshe á zuñwire an dámshe-aha vadale vuye na wá, yá cena ba palle á duksa-aha ufade na tá an shifa na an kwa á ndaha elva an ndzedá ba seke hula á samaya. A ba ñane: Sesse!

² Estuwa ya kante ice wá, yá zhára ba sesse belsa dzayye telle, antara ura áte iga. Edda una áte iga á belsa ñanna an leka am erva, ta fadanse ire an lówani. Edda-aara ñanna slemidala jipu, a sessehe geni á de gá midalire zlafe ádaliye.

³ Daaci egdza zhel kyáwe na a weraa dámshe á buwire, yá cená ba buwire á duksa-aha na tá an shifa á ndaha elva á ba an ká kwára. A ba ñane wá: Sesse!

⁴ Kertenj sesse belsa umele kyanje antara ura áte iga. Ta fanem katsakar yaikke ge edda una áte iga á belsa ñanna, ta vante hákuma ganakini a janaaja hairire am duniya bademme, tá cebaavecebe emnde am dagave-aatare.

⁵ Egdza zhel kyáwe na a weraa keyire á dámshe, daaci yá cená ba keyire á duksa-aha ufade na tá an shifa na á ndáhá elva, a ba ñane wá: Sesse! Yá zhára ba sesse belsa duñwe

gyegunyiye, antara ura áte iga. Edda una áte iga á belsa ṅanna an daráme am erva-aara.

⁶ Yá cená ba ndáhá elva duksa umele ba seke kwará á urimagwe, a ba ṅane: Mbera á ura palle áte váha palle wá, a jauka am gane á gwázhama nagwadá palle, bi gane á gwasá nagwadá keye. Amá tara waye, antara mbazla wá, naba yaterya a njarinja, a ba ṅane.

⁷ Daaci egdza zhel kyáwe na a weráa dámshe ufadire, yá cená ba ufadire-aatare ge duksa-aha ufade na tá an shifa na: Sesse! a ba ṅane.

⁸ Yá zhára ba sesse belsa umele, jili-aara izhegizhege, antara ura áte iga. Zhera á edda una áte iga á belsa ṅanna Emtsa. Ankwa á dabaná fáya am iga. Ta vaterte hákuma á ceba shifa á emnde an katsakar ge itare. Emnde umele, tá cebaterá an waya, emnde umele, tá cebaterá an lapikere, emnde umele keni tá cebateraaceba dabba-aha á kaamba. Daaci tá de kedanaakeda itare kyalma á kyalma á duniya.

⁹ Daaci egdza zhel kyáwe na a weráa dámshe ilyebire, yá zhára ba shedekwe-aha á emnde na ndza ta cebateraa adaba ta lyevaa elva á Dadaamiya, ta ankwa ndater elva á Dadaamiya ge emnde na, tá am sera á duksa na tá icaná sadake á dabba ge Dadaamiya átekwa na.

¹⁰ Ta belu hula á ba an ndzedá, a ba itare: «Yaakadada á ṅere, ka cudfedde, ka slejirire ba ekka. Ká ufa vaatara ge kyá shairiya á emnde na ta cebaa shifa-aha á ṅere am duniya na? Ká de fan vaatara zladá áte itare?»

¹¹ Ta tegateraa zane dzayye ma ge ware-aatare keni bademme, ta bateraa: «Puwawansepuwe

emtsaafde ádaliye duksa á kure, zlafe njá á kure demmekaa una, kwa emnde na ta cebakuraa adaba elva á Dadaamiya. Sey má cebareceba egdzar mama-aha á kure emnde a fetarfe na jarauje, lauktu watse tá kya shairiya.»

¹² Daaci egdza zhel kyáwe na a weraa dámshe unkwahire, a naba gejaptehe ge duniya bademme á ba an ndzedá, vaciya nyefnye danjwe gyegwenyiye ba seke jampi. Tere keni nyefnye kyanje hanje ba seke uzhe.

¹³ Terlyákwa-aha keni tá geda á sem repepepepe ba seke egdza á náfá na á serbaná vaciya má á vátá effeya na.

¹⁴ Samaya keni a fadapte ba seke buce, a kedehé ba estuwa. Tara wa-aha bademme, antara haha-aha na tá am dagave á háye-aha, tsaretse am slede-aha-aatare bademme.

¹⁵ Emnde bademme, an emnde na tá kwará ire-aatare-ka, an náve-aha-ka, bademme zhagadarezhagade, de shabarevshabe am hwalakwa-aha áte wa-aha. Antara ba slekse-aha á larde, ira mále-aha á ekse, antara mále-aha á sawji-aha, emnde a berba, ira emnde a ndzedá, bademme zlarzlálá á de shebe.

¹⁶ Tá ankwá nater elva ge egdzar wa-aha, antara wa-aha sadafde, a ba itare an kyuwa: Zazawanerarzaze seke táslawa á kure. Shebawanerveshebe seke átuge ice á slekse yaikke na am kurshi, antara egdza zhel kyáwe na an ervaunde-aara na táslawa á kure.

¹⁷ Adaba herzhe watse á maga hákuma-aara áte njere, adaba jaaja ervaunde áte njere. Ankwá ura watse á dzegwándzegwa tse vacite njanna emtu, a ba itare.

7

Malika-aha tá fafa lám̄ba á Dadaamiya áte emnde-aara

¹ Am iga á una-aha ṅanna maa, ya naa malika-aha ufade, tá tsaatse am karafke-aha ufade ge ekte á samaya. Ta ṅanaahe effeya-aha gergere ufade na badem̄me, ganakini a sawka á sem duniya, ma áte haha, ma áte háye, ma áte náfa-aha keni.

² Ya nanna zlaḅe ádaliye malika umele, á sawa á sa am gedi, am lám̄ba á Dadaamiya na edda á shifa na am erva. Daaci a kante kwárá ba shagera ge dáha malika-aha na itare tá an hákuma á badza tara haha an yáwe na.

³ A ba malika ṅanna wá: «Fauka emtsaade erva áte haha. Ma ge yáwe, ma ge náfa-aha keni fawaterfeka emtsaade erva, sey má zlanjeruzle ṅere ge fafatera lám̄ba-aha áte wafke-aha-aatare ge emnde a Dadaamiya á miya.»

⁴ Cekwaanṅuḍi wá, yá cena tá biya kezlakula á emnde na ta fafaterte lám̄ba á Dadaamiya áte wafke ṅanna, ta emnde debu deremke an debu kul ufade ju ufade. Emnde ṅanna badem̄me ta segáshe á ba am jeba-aha á *Iserayiila-aha.

⁵ Ta fafete lám̄ba ṅanna áte emnde á Yahuda, ta emnde debu kelaawa ju buwa. Ta fafete áte emnde á Raubain, ta emnde debu kelaawa ju buwa, ta fafete áte emnde á Gada, ta emnde debu kelaawa ju buwa.

⁶ Ta fafete áte emnde á Asair, ta emnde dubu kelaawa ju buwa, ta fafete áte emnde á Naiftalim, ta emnde debu kelaawa ju buwa,

ta fafete áte emnde á Manasa, ta emnde debu kelaawa ju buwa.

⁷ Ta fafete áte emnde á Simaun, ta emnde debu kelaawa ju buwa, ta fafete áte emnde á Laiwi, ta emnde debu kelaawa ju buwa, ta fafete áte emnde á Isakar, ta emnde debu kelaawa ju buwa.

⁸ Ta fafete áte emnde á Jabulaun, ta emnde debu kelaawa ju buwa, ta fafete áte emnde á Yusufa, ta emnde debu kelaawa ju buwa, ira emnde á Bainjamain, itare keni ta emnde debu kelaawa ju buwa. Kwaya ηane emnde a *Iserayiila na ta fafaterterte lám̄ba á Dadaamiya áte wafke na.

Nalgaadama á katafke á Dadaamiya am sleksire-aara

⁹ Am iga á una-aha ηanna maa, ya naa nalgaadama, baaka kezlakula-aatare dekideki, ta sawa am larde-aha á duniya badem̄me, jeba-aha á emnde badem̄me, ma una áme, ma emnde na tá ndáha elva a ekse-ara keni. Badem̄me á nálga á emnde ηanna a jamme á katafke á Dadaamiya am sleksire-aara, ta buwa antara egdza zhel kyáwe. Emnde ηanna badem̄me tá á ba am zane dzaydzaye, tá an erva-aha á debina am erva-aha-aatare badem̄me ge m̄ará higa-aatare.

¹⁰ Ta ketaa kwárá-aatare á dem zhegela, a ba itare: «A lyanjeraa ba Dadaamiya na náwa am sleksire-aara, ta buwa antara egdza zhel kyáwe baaka umele.»

¹¹ Malika-aha badem̄me ta jantaave ge Dadaamiya am sleksire-aara, antara emgyegwar zála kul buwa ju ufade na, ira duksa-aha ufade

na tá an shifa am vuwa na. Daaci bademme-aatare reppe garaavege á dem áhá, tá ankwá kezlan ugje ge Dadaamiya na am kurshi á sleksire-aara na.

¹² Ta bántsa itare: «*Aamin! Gálá wá, á zlayák ba ge ekka Dadaamiya. Ká an demdemire, ká an hákuma, ká an ilmu, ká an ndzedá, ká an gázlagazla. Náj paslaká erva, njá slafaká we ba ge ekka palle, dem ba ge dekideki. *Aamin!»

¹³ Daaci, a ba palle á emgyegwar zála na á elvan ge iya: «Diyakaterdiya emtu emnde njanna tá am zane dzaydzaye na? Ta emnde-ara itare?»

¹⁴ Ya njwanante: «Diyanagerka, ka slediyaterdiya ba ka ámbarka á nj.» Daaci a ba njane á elvan ge iya: «Una degiya emnde na ni ndza ta bashu zladá yaikke am duniya, dete halavuwa á zladá njanna keni gazlarka dekideki na. Itare ta emnde na ni revasereve zane-aha-aatare am uzhe á egdza zhel kyáwe, garanvege dzayye na. Amaana bararsebare ervaunde-aha-aatare am uzhe á Yaisu *Almasiihu.

¹⁵ Adaba una njanna, náwa itare saremsa á se katafke á Dadaamiya am kurshi á sleksire-aara. An vayi vacika tá maganá slera am mashidi-aara, á fateru hyema ba njane.

¹⁶ Itare tegarevtege antara waya, antara ndera, ira kárá á vaciya. Ma jeba-ara keni baaka názu á de hyaterá lyuwa ge itare dekideki.

¹⁷ Ya ndahanaa adaba uwe una? Adaba ba egdza zhel kyáwe na kwáye am dagave á kurshi-aha na una á de geva suni-aatare. Á de dáterá á dem tate á yáwe á shifa. Watse á de halatersa ba

Dadaamiya an erva-aara yáwe á kyuwa am ice ge itare.»

8

Egdza zhel kyáwe anjwa á werá dámshe á vadale na á halayuwa átekwa

¹ Am iga á una-aha ñanna maa, egdza zhel kyáwe na a weraa dámshe vuyire. Dámshe na wá, á halayuhále átekwa. Am sarte na a werante na wá, bademme á názu am huđe á samaya tsaatse kedekke, á maga kyalma á saa baaka názu á gejava dekideki.

² Daaci yá zhára ba malika-aha, ta vuye kalkale, tá tsaatse á katafke á Dadaamiya, ta tegaterem derkwákwá am erva.

³ Anjwa malika umele zlabé ádaliye, an egdza erba á dindar na tá díza kajiji am huđe-aara am erva, a de tsanve ge duksa na tá icaná sadake átekwa ge Dadaamiya na. Daaci ta halanu kajiji kwakya ge malika ñanna, ganakini á dízaná á katafke á Dadaamiya áte tate á icaná sadake ñanna. Daaci ta weshapte estuwa tara yire á kajiji ñanna, antara maduwa-aha á emnde na fartarfe á ba an jirire na.

⁴ Daaci ta tsete estuwa tara yire á kajiji na, antara maduwa-aha á emnde a fetarfe á deza Dadaamiya.

⁵ Daaci malika na, ba zlauzle am una ñanna, a eksetaa egdza erba a díza kajiji na, a tsakem slaya á kára na áte tate á faná sadake ge Dadaamiya na, a naba kyanaahe á sem duniya. Daaci njaanja tara hula á samaya, antara kára á ráde, haha keni a naba gejava á ba an ndzedá.

Ferta derkwákwá á Malika-aha vuye

⁶ Malika-aha vuye na ta tegaterem derkwákwá am erva na magarnaamaga niya ge ferta derkwákwá-aha-aatare.

⁷ Zujjwe á malika-aha njanna a fertante náza-aara, wesharáptewesha tara nálandze, antara kárá, ira uzhe, tá anjwa hya á sem duniya. An tega duniya kar keye, kar palle na an pesha an kárá, tara esseba, antara náfa-aha bademme tá an pesha.

⁸ Buwire á malika-aha njanna keni a fertante derkwákwá-aara, ta mbar kárá ge daada duksa umele ba seke wa yaikke, ta devese, ta eblyanme am háye.

⁹ An tega háye-aha am duniya kar keye, kar palle na nyefnye uzhe hájje, bademme á názena an matsaremátsa am háye-aha njanna. Paare-aha á yáwe keni bademme badzarevbadze am tate-aha njanna.

¹⁰ Keyire á malika-aha njanna a fertante náza-aara keni, a nejlehe ge daada terlyákwá, á mba ba kárá bademme, daaci a eblyeme am kar palle á derve-aha yáwe, antara mánjebe-aha, tate á yáwe bademme, njane a badzeva yáwe kar palle am keye.

¹¹ Zhera á terlyákwa njanna wá, Agugu, amaana: yaiyaihire. Yáwe-aha am duniya bademme a tegese kar keye, kar palle na gevge yaiyaihe bademme ba seke wáye á dále, yaiyaihire á yáwe-aha njanna a cebaa emnde kwakya.

¹² Ufadire á malika-aha njanna njane keni a fertante derkwákwá-aara, ma ura-ara keni a

tegese kar keye ge tara vaciya, antara tere, daaci vaciya keni kar palle gevge danɲwe, tere keni kar palle gevge danɲwe. Terlyákwá-aha keni ba estuwa: am keye, palle gevge danɲwe, am keye, palle gevge danɲwe, bademme ba estuwa. Daaci a gulaa estuwa parakkire á duksa-aha na tá am samaya na. Am kar keye, ta keɗaa palle. Váha palle a tegese kar keye, am palle baaka parakkire ba cekwaanɲudí keni. Vayiya keni ba estuwa ɲanna.

¹³ Daaci ya ketaa ice á dem samaya wá, yá cena ba kyuwa á zele am samaya yiyiye jipu, herzhe á shanaasha samaya. Álawlawlawlaw, a ba zele ɲanna, paláse á kure kwa emnde na kwá áte haha! Ankwa á tsekwa zlaɗa yaikke má fertaranteferta malika-aha na jaruje na derkwákwá-aha-aatare!

9

¹ Kerten fertanteferta názá-aara ilyebire á malika-aha ɲanna. Yá zhára ba terlyákwá umele á belá am haha, a eblyaa sawa am samaya. Ta vante egdza a tsekweram am erva ge ɲane, ge wera evege shagerka na baaka halawuwa á sladɗire-aara ɗekideki na.

² Ba a wertaa evege ɲanna wá, shelle ge yire, á segashe am huɗe á evege ɲanna, ba seke yire á kára na yaikke jipu na. A heɗanuhe ge vaciya bademme, tábedámme sleɗe bademme.

³ Daaci á kelá ba dikele á iwe-aha, á segashe am yire ɲanna, hyemhye am duniya bademme. Ta vaterte hákuma ge iwe-aha ɲanna ba seke názá á herdza-aha na tá am haha na.

⁴ Ta bateraa a farka we-aatare dƙidƙe ma áte mása, ma áte náfá-aha keni, a wawarwáwa ba emnde na ta baaka an lámƙa á Dadaamiya áte wafke-aha-aatare na.

⁵ Amá ganakini tá zlánaazle ba dƙidƙe shifa am ura wá, varaterteka baráma-aara. Ta bateraa ba a magaraternaamaga paláse am tere ilyebe ɲanna. Iwe-aha ɲanna má warewa ura wá, zláƙa-aara ba kalkale antara zláƙa na á tapaná ura má waawa herdza.

⁶ Am tere ilyebe ɲanna, emnde tá de katáná an kátá emtsa, amá watse baaka pute. Watse tá yekaná an yeka emtsa, amá watse á duka emtsa ádezetare.

⁷ Iwe-aha ɲanna wá, tá gáráva an belsa-aha na má tá dem wáva na. Tá an duksa-aha umele ba seke dzakwa á sleksire na ta maganaa an dindar na am ire-aha-aatare. Wafke-aha-aatare tá gáráva an zála.

⁸ Úgje-aatare ba seke úgje á ɲwasha, slare-aatare keni ba seke slare á ɛvare.

⁹ Ta shabanve uksuwe-aha-aatare am duksa umele ba seke kyebebbe á íre. Hula á lyambáke-aatare ba seke hula á darkwa-aha na tá tadáná belsa-aha na tá hadzala á dem tate á wává.

¹⁰ Iwe-aha ɲanna, itare tá wa ura an kataliya seke herdza. Tere ilyebe tá aɲkwa á magaterá paláse ge emnde an kataliya-aha-aatare.

¹¹ Tá an slekse-aatare yaikke arge itare. Slekse-aatare ɲanna wá, malika na á kwaraná ɲane evege shagerka na baaka halavuwa á sladƙire-aara dƙidƙe na. Slekse-aatare ɲanna wá, an elva á Ibraniɲkau tá dƙaháná an Abadaun, an elva á Yunaniɲkau wá, tá dƙaháná an

Apauliyaum. (A ba zhera-aha ḡanna wá: Slebadza duksa.)

¹² A degáshe estuwa palása á zunḡwire áte una ni a ndahanaa zeke ḡanna. Tá aḡkwa sawa zladfa-aha umele zlabé ádalije buwa.

¹³ Daaci unḡwahire á malika-aha ḡanna a fertante derkwákwa-aara ḡane kení. Ya ketaa ice wá, ya naa duksa na tá faná sadake átekwa ge Dadaamiya, na ta maganaa an dindar. Yá cena ba kwára á ura á segáshe am we á námbanḡwa-aha-aara ufade kerde ge duksa na tá fa sadake átekwa na.

¹⁴ A ba edda-aara á elvan ge malika ḡanna: «Palateraapála malika-aha na ufade na tá an ḡwadfa áte we á guwa na tá dfahána an Aifratis na.»

¹⁵ Daaci ta palateraahé malika-aha na. Itare wá, ndza ta fáter ganakini slera-aatare sey tá maganá am iva ḡanna, am tere ḡanna, am hare ḡanna, antara am sarte ḡanna kení. Am sarte ḡanna wá, tá de ceba emnde kwakya am duniya. Am kar keye, kar palle na tá de ceba emnde ḡanna bademme.

¹⁶ Ta biyaa kezlakula á dikele á sawji-aha á malika-aha ḡanna tá áte belsa-aha na wá, ta meliyauḡ deremke buwa.

¹⁷ Am wáháyu-aaruwa wá, ya náternaa belsa-aha, antara emnde na tá áte iga-aha-aatare bademme. Emnde ḡanna tá am kyebebbe á íre an deva ba kyanḡe ba seke kára, zlabé ádalije áte danḡwire seke yire á kára na yaikke vayvaya na, seke jili á yáwe á tambali zlabé ádalije. Ire á belsa-aatare wá, seke ire á ervare.

Á segashe ba kárá, antara yire, ira *baraudau am mbuwe-aha-aatare.

¹⁸ Sabaaba-aha keye ñanna, amaana: tara kárá, antara yire, ira *baraudau na á segashe am mbuwe á belsa-aha ñanna, cebaaceba emnde kwakya. Am emnde keye, a jaa palle.

¹⁹ Hákuma á belsa-aha ge magateraa palása ge emnde na wá, á ba am mbuwe, antara kataliya. Ágira kataliya-aatare wá, ba záhe surum-surume ge belsa-aha ñanna, tá ceba emnde an ñane.

²⁰ Aley, emnde na jaruje an shifa na magarka tuba ðekideki. Itare tá kezlater ugje ba ge shaitaine-aha, tá maga ba hele-aha-aatare gergere. Hele umele tá maganá an dindar, umele tá maganá an lipela, umele ba náfá, umele nákwá. Duksa-aha ñanna wallá tá nanna ice-ka, wallá tá cenáncena duksa á dem hyema-ka, tá zlaltezalálá-ka, uwe-ka.

²¹ Zlafe ádaliye, emnde ñanna tá ceba ba shifa, tá maga ba gwardzire, antara zawarire, ira neylire, tá yánka ðekideki.

10

Malika an egdza wakita

¹ Am iga á una ñanna maa, ya naa gwarda á malika umele zlafe ádaliye, á tsekwa á sa am samaya. Malika ñanna an tsekwa am kumba, antara kataliyavere takarre am ire. Wafke-aara á maga wulwulire ba seke vaciya, sera-aha-aara ba seke nara á kárá.

² Malika ḡanna an egdza wakita am erva, wakita ḡanna á ba an wera. Sera á nadafa-aara á tsaná am dagave á háye, sera á názlaḡa wá, kwaye á de tsaná áte haha ba yiyiye an háye.

³ Ndasendahe elva-aara palle wá, zlála á kwára-aara ba seke kyuwa á ervare. Am iga á kwára-aara ḡanna, yá cena ba ḡwartenḡa válaha á samaya ta vuye.

⁴ Yá kátá puwetepuwa názu ta ndahanaa válaha á samaya ḡanna ta vuye na, kertenḡ yá cena kwára umele zlaḡe ádaliye á ndahi elva á sa am samaya, á ba edda-aara: «Puweka elva ḡanna, a ḡjinja á ba am huḡe á ḡa.»

⁵ Daaci malika na sera-aara palle a tse am dáḡave á háye, palle áte haha na, a ketaa erva nadafa-aara á dem samaya,

⁶ a zu waḡa á katafke á Saksage na ma vaatara keni ḡane ba ḡja-aara, a nderanaa ba ḡane samaya, antara názu átekwa baḡemme, a nderanaa ba ḡane haha, antara názu átekwa baḡemme, a nderanaa ba ḡane yáwe, antara názu am huḡe-aara baḡemme na. A zu waḡa ḡeni ba jirire duksa-aha ḡanna herzhe á mag-ava, má zlaruzle malika-aha baḡemme ge ferta derkwákwa.

⁷ A bá ḡane wá: «Ba máki fertanteferta vuyire á malika-aha derkwákwa-aara wá, Dadaamiya keni á zlanazle áte una ḡanna ge máḡa jirire á názena á kataná ḡane, ndza a bela emnde a slera-aara nabi-aha, ta se ebbála na.»

⁸ Daaci edda una ndza ya cenaa kwára-aara á ndahi elva á sa am samaya na, fiyantaufe zlaḡe ádaliye, a ba ḡane: «Edduwa lyevaalya egdza

wakita na an wera am erva á malika na a tsa sera palle am dágave á háye, sera palle áte haha na.»

⁹ Daaci duwa-aaruwa á de lyiya egdza wakita am erva á malika ñanna. Viteva wakita na, á ba iya á elvan ge ñane. A ba ñane: «Náwa lyevaalya, zuze bademme, watse ñennene am mbuwe á ña ba seke nama, amá watse á de gevge yayiaihe am kulmbe á ña ba seke dále.»

¹⁰ Ya lyevaa egdza wakita na am erva-aara, ya zuhe. Ba jirire wá, ndza ñennene am mbuwe-aaruwa ba seke nama, amá de gevge yayiaihe am kulmbe.

¹¹ Daaci, ta biya de emmága zlaɓe ádalíye nábiyire áte emnde a jeba gergere, áte larde-aha gergere, áte emnde a ndáha elva-aha gergere, antara slekse-aha-aatare bademme.

11

Seyde-aha buwa

¹ Daaci ta fiyem zade á gamara am erva, slacɗe ba seke lále á kura duksa, ta biyaa: «De kursekure huɗe á mashidi an ñane, kursekure antara duksa na tá faná sadake átekwa ge Dadaamiya na, kezlaterkezla emnde na tá maga maduwa am mashidi ñanna bademme.

² Amá kureka huɗe á riya-aara, fanuka hyema ge tate ñanna ɗekideki. Adaba yarateránya tate ñanna, antara huɗe á berni cudeɗɗe ñanna bademme ge emnde na ɗabarka Dadaamiya na. Watse tá de záná itare, tá de payáná itare an sera-aha-aatare am tere kul ufade ju buwa.

³ Amá watse yá bela seyde-aha-aaruwa, tá an tsakwa am bagwadza-aha ba estuwa. Am sarte

ɲanna, watse tá baláná ba itare waazu á elva-aaruwa am háre debu an deremke buwa an kul uɲkwahe ɲanna.»

⁴ Seyde-aha buwa ɲanna wá, itare ta ba seke náfá-aha á juwe buwa, antara kárá á fanus-aha buwa, tá á katafke á Dadaamiya.

⁵ Máki ura á magaterá emtaɲkire wá, á naba segáshe kárá am mbuwe-aatare, á ceɓa kelaade-aha-aatare ɲanna, tá taa ɲezleka ɔ́kideki, sey ba tá emtsa.

⁶ Am zamáne-aatare na ni tá de maga nábiyire na, watse tá an hákuma jipu. Watse tá an hákuma á piyeta yáwe á samaya ganakini a hyeka ɔ́kideki; watse tá an hákuma á nyanve yáwe, á geva uzhe. Zlaɓe adaliye, watse tá an hákuma á sa sabaaba-aha gergere á sem duniya ge magateraa palása ge emnde, tá de magán ba seke una tá kataná itare.

⁷ Má watse zlaruzle itare á ɓálá elva á Dadaamiya wá, watse á sesse náza kaamba am evege shagerka na ɓaaka halavuwa á sladɔ́re-aara ɔ́kideki na. Watse á se wawa dabba ɲanna an itare, á de gáná ba ɲane midalire, á de cebaterceɓa ba bukerɔ́.

⁸ Amá emtsa-aatare watse tá yáterá á ba áte we á layye, am berni na ndza ta jaa edda-aatare áte dzanɲala na. Adaba názu ta maganaa emnde a berni, watse tá ɔ́há berni ɲanna an *Saudauma, bi Misera.

⁹ Emnde na tá am emtsa na wá, watse an piya ge heɔ́aterheɔ́a. Watse tá se zharaterzhára emnde á sa am larde-aha gergere, emnde a jeba gergere, antara emnde a ndáhá elva gergere,

emnde bademme tá de zhárá ba emtsa-aatare am háre keye an kyalma.

¹⁰ Watse bademme á emnde na tá am duniya na ervaunđe-aatare á de geva ba seke nama arge emtsa á emnde buwa ɲanna. Emnde a há tá de maga munri-aara, adaba ndza tá katerva ye kwakya áte ndáhá-aatare.

¹¹ Daaci am iga á háre keye an kyalma ɲanna, Dadaamiya á de fertaterem puwa shifa zlabé ádaliye á dem vuwa-aha-aatare, tá naba tsatsetehe. Daaci emnde na naráterna na gazlaregaza bademme.

¹² Ba itare keni tsaretse am haha, tá cena ba kwárá á ura, á daháterá á sa am samaya, a ba kwárá ɲanna á elvan ge itare: Dalaudálá ásehuna. Daaci ta naba ɲgye á dem samaya am kumba, am ice á kelaade-aha-aatare bademme.

¹³ Am sarte ɲanna maa, a naba gejapte ge haha á ba an ndzedá, am bere kelaawa an ɲgerdá palle, am bere kelaawa an ɲgerdá palle, huđe á berni ɲanna bademme ba estuwa. Emnde debu vuye una matsaremátsa bademme. Daaci emnde na jaruje an shifa na gazlaregazla jipu, farantaufe gálá Dadaamiya geni Sleksa ba ɲane palle, anƙwa am samaya.

¹⁴ A degashe estuwa palása buwire, amá keyire keni anƙwa sawa ba kinamina.

Malika á ferta derkwákwá vuyire

¹⁵ Am iga á una ɲanna maa, vuyire á malika-aha a fertante derkwákwá-aara keni. Daaci yá cena ba kwárá-aha tá valaha á sawa am samaya, a ba kwárá-aha ɲanna: «Dadaamiya Yaakadada, antara edda una a eksesaa ɲane

farantaufe sleksire-aatare áte duniya názá ba ge dekidefeki.»

¹⁶ Ba ďarude itare maa, reppe puwaraapuwa emgyegwar zála na ta kul buwa ju ufade na tá am kurshi-aha á sleksire na á dem áhá, tá anƙwa kezlan ugje ge Dadaamiya, a ba itare:

¹⁷ Dadaamiya Yaakadada arge duksa baďemme, am fantaufe keni ndza ba ekka, kina keni ba ekka ƚanna. Njá anƙwa slafaká we adaba hákuma á ƚa na ni eptsakanaptsa duksa baďemme á sem sera á ƚa na.

¹⁸ Kwakya emnde am larde-aha gergere ndza ta magaa ervaunđe an ekka. Kina wá, hyephye sarte á ƚa keni geni ká eptsaternaaptsa, hyephye sarte á ƚa ge kya shairiya á emnde a fáyá, hyephye sarte á ƚa ge tegateraa láďá ge emnde a slera á ƚa nabi-aha, antara ge emnde á ƚa umele keni baďemme, ge male-aha, antara emnde na garevka male-aha, emnde na tá an lyáwá á ƚa am ervaunđe na baďemme ká de tegateraa láďá. Emnde a bádza duniya keni hyephye sarte á ƚa ge ká ƚgerďateraanđerďa.

¹⁹ Ba ďarude itare wá, batanƚe a naba werthehe ge mashidi á Dadaamiya am samaya, antara ba nakwati am huďe á mashidi ƚanna ura á nanna baďemme. Nakwati ƚanna wá, á mára namána-aha na a ƚguďanaa Dadaamiya an emnde na. Am iga-aara, wesharáptewesha tara kára á ráde, antara válaha á samaya, nálandze keni ba seke una ni tá puwaná an puwa á sa am samaya, haha keni a naba geƚapte ba ƚárnƚare.

12

Mukse antara náza nye

¹ Daaci marápsamáre najipu yaikke am samaya. Ankwa mukse wá, a tsekweme am vaciya ákurá nanjyuwe-aara, a puwete sera-aha-aara áte tere. Ákura náza fada ire-aara wá, an terlyákwá kelaawa ju buwa am ire. Una nanna dzakwa á sleksire-aara ge nane.

² Mukse nanna keni á huđe, hyephye sarte-aara ge ya egdzere, ámbera ankwa á hula ge zlađa a ya.

³ Zlađe ádaliye, marápsamáre najipu umele yaikke á ba am samaya nanna. Ya naa ba dada náza nye, vuwa-aara an deva ba kyanne, an ire vuye á ba áte nane palle, antara derma-aha-aara kelaawa. Zlađe ádaliye, an dzakwa á sleksire am ire-aha-aara nanna vuye kerđe.

⁴ Kataliya á náza nye nanna shánaasha samaya, haa a bataa terlyakwa ba kwakya an nane á sem áhá. Am terlyakwa keye áte samaya, nane a betaa palle, am terlyakwa keye a betaa palle, bademme ba estuwa. Daaci a tsahe arge mukse na ankwa á ya egdzere na, ganakini má watse yaaya egdza-aara nanna, watse á ndunde nane.

⁵ Cekwaanḡuđi wá, mukse na yaaya egdzere zhele, watse á kwará egdze nanna duniya bademme an zade á íre. Daaci ta eksante egdze nanna, kwaye ta naba danaa á de katafke á Dadaamiya am sleksire-aara.

⁶ Emmarge egdzere maa, nane a kezlanaa á dem kaamba, á dete bálá na a tsatsanaa

Dadaamiya ganakini á de fanu hyema áhuwa ge ñane na. Watse á njá áhuwa am hare debu an deremke buwa an kul uñkwahe.

⁷ Am iga á una ñanna maa, njaanja wáva yaikke am samaya. Ba náza nye ñanna zlaɓe ádaliye antara malika-aha-aara, tá aŋkwa wawa antara *Mikayiilu ñane keni tá antara malika-aha-aara.

⁸ Amá hyafka náza nye ñanna áza *Mikayiilu. Ngyaratersengye antara malika-aha-aara baɗemme, tá taa piyeteka ba sera-aatare keni am huɗe á samaya mazle-aara.

⁹ Ta naba ngyanse estuwa dada náza nye ñanna. Ñane wá, tá eɗɗáhá zlaɓe an emgyegwe a záhe keni. Ta ngyaterse á segashe antara malika-aha-aara baɗemme. Zlaɓe ádaliye, ñane slekse á jini-aha, bi Shaitaine, una baɗemme ba zhera-aha-aara.

¹⁰ Am iga á wáva-aatare ñanna, ya cenaa ba kwará yaikke á valaha á sawa am samaya, a ba ñane wá: «Kina wá, Dadaamiya maresemáre hákuma á sleksire-aara baɗemme, lyámilya ba ge ɗekideki mazle-aara. Edda una a ek-sesaa ñane na keni maresemáre-aara baɗemme, aɗaba kwaye ngyansengye edda á fida na am samaya. Ba edda una ni ndza an vayi vacika á se icateraare sera ge egdzar mama-aha á miya áza Dadaamiya na.

¹¹ Amá egdzar mama-aha á miya garega mi-dalire. Názena ni itare ta gaken midalire na wá, ta gáná aɗaba uzhe á egdza zhel kyawe, antara aɗaba seydire na ta maganaa áte elva á

Dadaamiya, ta ndater ge emnde, ma emtsa keni eksaraarekse na.

¹² Adaba ngyaratersenyye nanna wá, ekkure samaya-aha higauhiga. Ekkure emnde na kwá am huđe á samaya-aha nanna keni higauhiga bademme. Amá palasa á kure kwa emnde na kwá áte haha, antara názena am huđe á haye keni bademme. Ya ndaaná adaba uwe una? Adaba kwaye tsekwátsekwa Shaitaine á dezekure, ankwá á tsekwa á ba an ervaunđe-aara, adaba diyaadiya ganakini sarte-aara a juwa ba cekwaanjudi.»

¹³ Am nánna náza nye na ganakini ngyaransenygye á sete haha, a fantau ge baka mukse na a yaa egdzere zhele na, ankwá á dabaná á dem kaamba.

¹⁴ Mbate kerten varanteva lyambake-aha á dada zelee ge mukse na, geni á ngye an nane á dem tate na a tsatsannaa Dadaamiya geni á de geláná átekwa am iva keye an kyalma na. Áhuwa wá, á shanaaka emgyegwe a záhe nanna mázle-aara.

¹⁵ Daaci ge baka mukse na wá, emgyegwe a zahe nanna a naba melese yawe wá, a naba gev guwa yaikke ganakini á de dándá yawe á guwa mukse na.

¹⁶ Amá: «Yá ankwá ya,» a ba haha, ankwá á melanumelee ge mukse na. Daaci haha keni werta we-aara, a shu yawe na ni a maganaa náza nye na bademme.

¹⁷ Daaci jaaja emtanjire náza nye na áte mukse na. A naba dateraa wawa ge egdzara á mukse nanna mázle-aara, amaana: Emnde na

ni lyarvaalye elva á Yaisu *Almasiihu, tá ankwá á fansaarefe ge Dadaamiya á ba an jirire na.

¹⁸ Á ba ankwá náza nye na a tsanu ge we á háye.

13

Náwa dabba-aha ta buwa

¹ Am iga-aara maa, yá zhárá ba ankwá á segashe dabba umele am háye, an ire vuye á ba áte nane palle, derma-aha-aara keni kelaawa. An dzakwa á sleksire áte derma-aha-aara nanna bademme, áte ire-aha-aara keni bademme ta pupuwete názu zlayeka defideki na ge zláza Dadaamiya an nane.

² Dabba nanna ya nanna na wá, tá gárava an ubela, amá sera-aha-aara wá, ba seke sera-aha á kere á kaamba, we-aara keni ba seke we á ervare. Náza nye na a vanta zade-aara, antara sleksire-aara, ira hákuma-aara bademme ge dabba nanna.

³ Ankwá palle am ire-aha á dabba nanna wá, ba seke ndza kyananmárekye, ba seke ndza emtsametsa deme, amá mbaambe. Am duniya bademme emnde tá maga ba najipu-aara, emnde bademme tá daba ba nane.

⁴ Daaci emnde bademme tá ankwá á kezlan ugje ba ge náza nye na, adaba a vanta nane hákuma ge dabba nanna. Tá ankwá kezlan ugje ge dabba nanna keni, ta bantsa itare: Ware edda una ta kalle an dabba na náwa nane na? Ware edda una á hyephye seke nane?

⁵ Dabba nanna shansha ndzedfa á válya elva, antara mága kuravire áte Dadaamiya. A shaa

ndzedá á mága una ñanna, am tere kul ufáde ju buwa.

⁶ Daaci a naba fantau ge valya elva áte Dadaamiya, a fantau ge nyanya zhera á Dadaamiya, antara tate na á njá Dadaamiya átekwa na, ira emnde na tá am samaya na bademme tá an nyainye.

⁷ Dabba ñanna wá, shánsha ndzedá ge wáva an emnde na tá ankwá dába Dadaamiya, a ganaa ba ñane ndzedá zlađe ádaliye. Dadaamiya a naba vante baráma ge sha hákuma áte larde-aha bademme, antara emnde am ekse-aha gergere bademme, ma tá ndaha elva a eksa-ara keni, duniya bademme á ba am erva-aara.

⁸ Bademme á emnde am duniya, watse tá kezlan ugje ba ge ñane, sey ba emnde na ndza an puwa zhera-aha-aatare am wakita á egdza zhel kyawe na, itare wá, tá de kezlanka ugje. Am wakita ñanna wá, an puwa zhera-aha á emnde na ni tá an shifa na á zleka na. Ta puwaterte daga am fakta á duksa bademme.

⁹ «Edda una ankwá hyema-aara wá, a effa ba shagera áte elva na yá ndahaná iya na:

¹⁰ Edda una ta yanu ganakini watse á dem erva á kelaade-aha na, ma estara keni baaka pekyá-aara. Iyau, edda una ta yanu ge katsakar, ma vaatara keni sey tá jana á ba an katsakar ñanna, baaka pekyá-aara dekideki. Duksa palle ge emnde a dába Dadaamiya wá, a garevge emnde a farvaunde, a fartarefe áte Dadaamiya.»

¹¹ Am iga-aara wá, ya nanna zlađe dabba umele, ñane a segashe am huđe á haha. An derma buwa, derma-aha-aara á gáráva an náza

á egdza zhel kyawe. Dabba ñanna á ndaha elva, ndaha elva-aara ba seke názá á náza nye.

¹² Dabba ñanna keni fantauka ba ñane an ire-aara mága duksa. Hákuma á mága duksa-aara wá, ba kalkale an názá á dabba zuññwire na. A magaa najipu-aha gergere á katafke á dabba zuññwire, a hyaterarhe á ba áte laarire ge emnde bademme am duniya, geni sey tá kezlan ugje ge dabba zuññwire na ndza ba seke kyanamárekye, ndza ba seke emtsamtsa, amá mbaambe na.

¹³ Kwakya najipu-aha na a maganaa buwire á dabba ñanna. Ñane a tsekwaá kárá á sawa am samaya á sete haha áte ice á emnde bademme, antara najipu-aha umele gergere.

¹⁴ Ñane varanteva baráma ge mága najipu-aha ñanna estuwa á katafke á dabba zuññwire na. A badu emnde bademme an una ñanna, a bateraa: «Nderaundera gáráva á dabba zuññwire na ndza kyanamárekye an katsakar, ba seke ndza emtsamtsa, amá mbáambe na, daaci kwá fansarefe.»

¹⁵ Dabba ñanna wá, ta naba bashanaa ge ñane á fatanem effeya á shifa am vuwa ge hele ñanna ta nderndera na. Gevge wá, ankwá á ndaha elva hele na, ganakini emnde na má kezlaranka ugje ge ñane wá, á cebaterceba bademme.

¹⁶ Dabba ñanna yá ankwá ndahaná ya na wá, a hyateraarehe á ba áte laarire ge emnde bademme am huđe á duniya, ganakini sey tá lyevalya lámba-aara áte iga a nadafa, antara áte wafke-aha-aatare bademme. Una an male-aha-ka, an egdzara-ka, emnde a berba an talága-

aha, emnde na tá kwárá ire-aatare, an náve-aha, emnde bademme.

¹⁷ Edda una má Iyiyaaka lám̄ba-aara wá, á taa shekweveka duksa, á taa veluka názá-aara keni dfekideki. Lám̄ba ɲanna wá, zhera á dabba ɲanna. An̄kwa zlaɓe umele kezlakula, una ɲanna keni á márá ba zhera-aara ɲanna.

¹⁸ Kezlakula na wá, sey á kyeppyee eɲkale á edda-aara, lauktu á diyeddiye názu am huɗe-aara. Kezlakula ɲanna wá, á maramiya tate na tá halavuwa átekwa emndimagwaha. Kezlakula-aara ɲanna deremke un̄kwahe an kul un̄kwahe ju un̄kwahe.

14

Láhe á emnde na tá an várá na am samaya

¹ Am iga a una-aha ɲanna maa, ya ketaa ice á dem samaya, yá zhárá ba tara egdza zhel kyawe áte ire á wa *Siyauna, tá antara emnde debu deremke, an debu kul ufade ju ufade na ndza ta fafete zhera-aatare, antara Eddenjara áte wafke á emnde ɲanna.

² Yá cena ba kwárá-aatare á sawa am samaya ba seke mága á yawe áte guwa yaikke. Ká kwárá-aatare ba seke válahe á samaya, amá tá belá láhe, antara gadzavera-aha-aatare tá jante ge láhe am hula-aatare ɲanna.

³ Una ɲanna tá bela láhe emnde debu deremke an debu kul ufade ju ufade na, tá an̄kwa gálá Dadaamiya am kurshi á sleksire-aara, ta jantaave duksa-aha ufade na tá an shifa am vuwa, ira emgyegwar zála kul buwa ju ufade

na. Láhe ñanna wá, láhe áñwaslire, ßaaka ura á diyeddiye láhe-aatare ñanna ðekidèki, sey ba emnde ñanna ta varaterse á sa am duniya na.

⁴ Sey ba itare ta emnde na ta tsufete vuwa-aatare am cufedðire, farka erva-aatare áte mukse ðekidèki na. Sey ba itare ta emnde na ta varaterse itare am dagave á emnde na tá am duniya na, tá añkwa ðaba ba egdza zhel kyawe ma á dem tate-ara keni. Itare wá, tá átuge tara Dadaamiya antara egdza zhel kyawe.

⁵ Itare wá, ta emnde na ndza cenaaránka elva fida am mbuwe-aatare ðekidèki, ta emnde cufedðe.

Malika-aha keye an slera-aha-aatare

⁶ Daaci ya ketaa ice, yá zhara ba añkwa á ñgye malika umele yiyiye jipu herzhe á shanaasha samaya. Malika ñanna añkwa á saterá labáre á higa ge emnde na tá am duniya. Labáre ñanna ßaaka zle-aara ðekidèki. Á saterán ge emnde a larde antara jeba gergere, ma tá ndaha elva-ara keni. Am duniya baðemme, á saterá ba labáre ñanna ge emnde.

⁷ Malika ñanna a ketaa kwara-aara ba shagera, a ba ñane á elvan ge itare: «Kuvaukuva Dadaamiya, galaugála Dadaamiya am yaikkire-aara, aðaba hyephye sarte-aara ge mága shairiya á emndimagwaha. Kezlawankezla ugje ba ge ñane edda una a nderaa samaya, antara haha, a magaa tate-aha á yáwe baðemme na.»

⁸ Kerten a ðabemhe ge buwire-aara, a ba malika ñanna: «Kina wá, zlauzle *Babila mazle-aara, á de mbedfa berni yaikke na. Ñane a

hyante shagerkire-aara áte larde-aha bademme, haa a jatera an ja ge emnde ba seke mbazla.»

⁹ Am iga a malika-aha ta buwa na wá, a d̄abateremhe ge malika ge keyire. Nane keni a ketaa kwara-aara ba shagera, a ba nane: «Ma ware una a kezlankezla ugje ge dabba n̄anna, antara gáráva á dabba n̄anna, ma ware edda una a lyevaa lám̄ba á dabba n̄anna áte iga a nadafaaara, bi áte wafke-aara, má ta magaa una n̄anna,

¹⁰ daaci tá de shá palása áza Dadaamiya ad̄aba jaaja ervaun̄de. Á de jaterá á ba an ja palása ba seke mbazla na karanteka yáwe d̄ekid̄eki na. Ma ware edda una maganaamaga duksa á dabba-aha n̄anna, edda-aara á dem kárá, kárá n̄anna an wessa an *baraudau, daaci á maga palása-aara á katafke á malika-aha á Dadaamiya, antara egdza zhel kyáwe.

¹¹ Ma vaatara keni yire á kárá n̄anna á wálá á ba an wálá shelle á dem zhegela, tá maga palásaaatare am huđe-aara. Bademme á emnde na ni kezlarankezla ugje ge dabba n̄anna, ma ge hele-aara na keni, bi má lyarvaalya lám̄ba-aara na áte vuwa-aatare, watse baaka puwansepuwe-aatare d̄ekid̄eki, an vayi vacika bademme tá shá ba zlad̄a.»

¹² Ad̄aba una n̄anna wá, ekkure emnde na kwá an̄kwa d̄aba Dadaamiya, fakurtarefe áte Yaisu an jirire na wá, sey kwá gevge emnde a farvaun̄de ba shagera.

¹³ Daaci yá cena ba kwárá umele zlađe ad̄aliye á sawa am samaya á ba an ndzed̄a. A biyantsa kwárá n̄anna: Puwetepuwa una: Ged̄a wá, watse an̄kwa áza emnde na tá emtsa am erva

á Yaakadada na, a ba ɲane. Daaci a ɲutehe ge Shedefkwe Cudedfde: «Una ba estuwa, a puwaransepuwe, adaba zlazladire á slera na ta maganaa itare na á kedfeka.»

Dadaamiya, antara emnde am halavuwa á duniya

¹⁴ Am iga a una-aha ɲanna wá, ya ketaa ice zlaɓe ádaliye wá, yá zhárá ba kumba dzayye ba telle. Anƙwa duksa umele a ɲjete áte kumba ɲanna, duksa ɲanna ba seke urimagwe. An dzakwa á sleksire ta maganaa an dindar am ire-aara, antara náza wá mása an slare jipu, a ɲanaahe am erva.

¹⁵ Daaci yá zhárá ba sesse malika umele am mashidi, a ba ɲane á elvan ge edda una á njá áte kumba na á ba an ká kwárá: «Werawera slakslakire áte duniya baɗemme, hyephye sarte a hálá duksa á se mba, eksanteksa náza wá mása á ɲa, ezzlálá á de ica hiya.»

¹⁶ Daaci a naba huviyante dada náza wá mása-aara ge edda una áte kumba na, a zlavanme am duksa na áte haha, kerten ɓaaka an ica duksa baɗemme.

¹⁷ Yá zhárá sesse malika umele keni á ba am mashidi ɲanna am samaya na, ɲane keni an dada náza wá mása-aara, sláre jipu, a ɲanaahe am erva.

¹⁸ Sesse malika umele zlaɓe ádaliye am huɗe á duksa na tá faná sadake ge Dadaamiya átekwa na. Malika ɲanna wá, male á kárá baɗemme. A ba ɲane á elvan ge ukfeɲara na an náza wá mása am erva na, á ba an ká kwárá: «Egdzara á náfa-aha na tá herɗaná emnde am duniya

bademme navene, ekka keni de efdatsa an názá wá mása á ña.»

¹⁹⁻²⁰ Daaci ñane keni naba huviyante náza wá mása-aara, a tsakaa egdzara áte náfá-aha ñanna am duniya bademme. Kwaye a de ndakanaa am tate á beca egdzara á náfá. Tate na ni tá beca egdzara á náfá átekwa na wá, kwaye áte iga a ekse. Am sarte na tá anƙwa beca egdzara á náfá ñanna baaka duksa umele, á kela ba uzhe ba kyaññe ba seke yáwe á kela, haa a magaa guwa yaikke. Yiyire á guwa ñanna kilaumaiter deremke keye. Sledfire-aara keni a ektseve ba cekwa am wálá á ura. Una-aha ñanna bademme na wá, á kwaramise ba názu watse á magaterná Dadaamiya ge emnde na ni tá anƙwa am ervaunƙe-aara ge mageteraa palása am halavuwa á duniya.

15

Malika-aha tá an zlakta á masiba-aha

¹ Am iga á una ñanna maa, ya naa ba marápsemáre najipu umele am samaya. Ya naa malika-aha ta vuye, masiba-aha keni vuye tá an ñane. Á halavuhále masiba-aha áte una ñanna, ervaunƙe á Dadaamiya keni baaka mazle-aara am iga á una ñanna.

² Daaci yá zhárá ba duksa umele ba seke háye, amá anƙwa á maga wulwulire ba seke kweteram, an wesha an kárá am huƙe-aara. Zlabe ádaliye, ya náternaa emnde na garega midalire arge dabba, garega midalire arge gáráva á dabba ñanna, itare lyiyarka lámbe á dabba ñanna zhera-aara kezlakula na. Ya náternaa tá

aŋkwa á tsaatse áte we á háye ŋanna ba seke kweteram na, tá an gadzavera-aha-aatare am erva, a vatertaa Dadaamiya.

³ Tá aŋkwa bela láhe á Muusa sleslera á Dadaamiya, antara láhe á egdza zhel kyawe. A ba láhe-aatare:

Dadaamiya Yaakadada, ba ka palle una ka edda á hákuma áte duksa bademme. Slera á ŋa ge ekka, baaka kalle-aara an shagerire. Slera á ŋa, slera yaikke. Ka slekse á larde-aha bademme. Bademme á názena ká maganaa ka, ká maganá á ba áte unŋule-aara, ba ekka una ka edda á jirire.

⁴ Yaakadada, ekka keni aŋkwa ura á kuvanŋka emtu? Aŋkwa edda una á kezlanŋka ugje emtu? Bademme á larde-aha watse tá se ba am sera á ŋa, tá se galakgálá. Adaba ba ekka palle una ka cudefde. Názu ká maganá ka am bereka. Bademme ká aŋkwa maganá á ba áte unŋule-aara.

⁵ Am iga á una ŋanna zlaŋe ádaliye maa, ya ketaa ice á dem samaya wá, yá zhára ba we á mashidi am samaya an wacene. Am huŋe á mashidi ŋanna, aŋkwa egdza mashidi á nalba na tá ja ire tara Dadaamiya antara emndimagwaha amkwa na.

⁶ Daaci yá zhára ba malika-aha vuye na tá an masiba-aha na tá aŋkwa segashe am mashidi ŋanna. Tá an tsekwa am nanŋyuwe dzaydzaye ba telle, áte lefedfire, ta ŋgwadese uksuwe-aha-aatare an kanda á dindar.

⁷ Daaci duksa-aha na tá an shifa na, palle-aatare wá, a tegateraa egdzara erba-aha ta maganaa an dindar ge malika-aha ŋanna. Egdzara

erba-aha ṅanna tá an naha degwun á Dadaamiya ba caicare an we-aara, Dadaamiya na an shifa, ma vaatara keni ba ṅane.

⁸ Daaci, baɗemme á huɗe á mashidi na an naha an yire. Yire ṅanna wá, hákuma, antara ɗemɗemire á Dadaamiya. Palle á ura á dzegwándzegwa dem mashidi ṅanna ɓaaka, sey má zlaruzle malika-aha ṅanna ta vuye na ge mága masiba-aha-aatare baɗemme.

16

Malika-aha tá de puwa masiba-aha am duniya

¹ Daaci yá cena ba kwára yaikke, á ndaha elva á sawa am huɗe á samaya, a ba kwára ṅanna á elvan ge malika-aha na ta vuye na: «Zlauzlálá á de puwa degwun-aha á Dadaamiya na am egdzara erba-aha na, de puwawpuwa baɗemme á dem duniya.»

² Daaci zuṅwire á malika-aha ṅanna a de puwanve náza-aara á dem duniya, sesse wige-aha áte emnde na lyarvaalya lámba á dabba áte vuwa-aatare, kezlarankezla ugje ge gárava á dabba ṅanna. Wige ṅanna zlazlaɗa á we jipu.

³ Daaci buwire á malika-aha ṅanna a de puwanve náza-aara keni, ṅane a de puwanaa á dem háye. Háye-aha baɗemme nyairevnye uzhe, ba seke uzhe a emtsa, baɗemme á názena an shifa na emtsaremtsa am huɗe á háye-aha ṅanna.

⁴ Daaci, keyire á malika-aha ṅanna keni a de puwanve náza-aara á dem derve-aha, antara

tate-aha á yáwe bademme, yáwe-aha bademme ta naba nyef uzhe ba kyanje.

⁵ Yá cena ndaha elva á malika umele, nane wá, male á yawe-aha bademme, a ba nane wá: «Ekka Dadaamiya, ka cufedfe. Kwaye am fakta, sem kina keni ba ekka nanna. Shairiya á na ká anjwa maganá áte unjule-aara.

⁶ Adaba emnde nanna ndza ta puwa uzhe á emnde á na, ndza ta puwa uzhe á nabi-aha á na. Daaci má vatena ká anjwa vaterte uzhe geni a sharushe wá, una tá shá nampire á názena ndza ta maganaa itare na.»

⁷ Daaci yá cena ba kwára umele zlafe adaliye á ba an ndzedá, á segashe am duksa na tá faná sadake ge Dadaamiya átekwa na, a ba kwára nanna wá: «Ba estuwa Dadaamiya Yaakadada, ká an hákuma ba ekka palle, ka slejirire, shairiya á na á ba áte unjule-aara.»

⁸ Daaci ufaðire á malika-aha nanna keni a de puwanve náza-aara. Nane, kwaye a de puwanaa áte vaciya. Daaci varanteva baráma ge vaciya, ganakini a farfe ge mbera kára-aara ba shagera áte emnde am duniya.

⁹ Am emnde taparántápá warwarire á vaciya, itare ta fantau ge zláza Dadaamiya kelaa bademme á masiba-aha á ba am erva-aara na. Dzamarka áte yaikkire á Dadaamiya, magarka tuba arge haypa-aha-aatare.

¹⁰ Daaci ilyefire á malika-aha nanna a de puwanve náza-aara keni. Nane, a de puwanaa áte kurshi á sleksire á dabba yaikke na. Daaci a naba tsekwa ge tabedammire á dem kwára-aara

baɗemme, emnde tá ɗatsa ba nara an slare ge sha zlaɗa.

¹¹ Aley kwalarevkwále ge tuba. Baira itare tá zlazla Dadaamiya aɗaba wige-aha na áte vuwa-aha-aatare, antara palase na tá aŋkwa á maganá itare na.

¹² Daaci uŋkwahire á malika-aha ɗanna keni a de puwanve náza-aara. Ɗane, a de puwanaa am guwa yaikke na tá ɗahaná an Aifratis na. Daaci a naba derehe ge yawe am guwa yaikke ɗanna baɗemme, haa slekse-aha umele am geɗi sharánsha baráma ge sawa ásehuna mazle-aara.

¹³ Daaci yá zhára ba jini-aha ta keye, tá gáraɗa an mugza-aha. Palle-aatare, a segashe am mbuwe á náza nye, palle, a segashe am mbuwe á dabba yaikke, palle keni a segashe am mbuwe á nabi fida.

¹⁴ Baɗemme ba jini-aha á shaitaine na mbarsembe mága najipu-aha kelaazare na. Ba jini-aha ɗanna una watse tá dem slekse-aha á larde baɗemme, watse tá jatermaare átirpalle ganakini tá wawa an Dadaamiya Saksage na hákuma baɗemme á ba am erva-aara na. Una ɗanna á de magava am hare yaikke na Dadaamiya á de mára hákuma-aara arge duksa baɗemme na.

¹⁵ «Ay degiya, faufa hyema ba shagera, watse yá sawa an ıla ba seke neyle. Geɗa wá, watse aŋkwa áza edda una paaka háre, fanufe hyema ge naŋgyuwe-aara na. Ɗane wá, yá se bereka an ukhyiye dey, á demka am zherwe yaikke.»

¹⁶ Jini-aha ɗanna wá, kwaye ta de jemaa slekse-aha ɗanna am tate na tá ɗahána an

Harmagaidaum an elva a Ibraniṅkau na.

¹⁷ Daaci vuyire á malika-aha ṅanna, ṅane keni a de puwanve náza-aara am zhegela ba estuwa, yá cena ba kwárá yaikke á sa am huđe á mashidi. Kwárá ṅanna a segashe am tate á kurshi á sleksire á Dadaamiya. A ba ṅane wá: «Zlauzle áte una mázle-aara.»

¹⁸ Daaci njaanja válaha á zhegela, antara kára á rade, a naba gyaigyaite ge haha á ba an ndzeḍa ba ṅáṅare. Daga ta nderaa estuwa urimagwe am duniya keni ndza gyaigyaiteka haha estuwa ḍekideki.

¹⁹ A naba tapse ge berni yaikke gergere keye daga á sawa am huđe á haha baḍemme. Berni-aha umele na ni tá am huđe á duniya na keni baḍemme badzarevbadze. Adaba zlaḅe seska emtaṅkire na ta maganaa emnde a *Babila ṅanna am ervaṅḍe á Dadaamiya. Adaba una ṅanna, aṅkwa á magaterá palása, tá taa kanteka ba ire keni ge zlaḍa ṅanna, ba seke emnde na a cebateraa mbazla na karemka yawe am huđe-aara ḍekideki na.

²⁰ Wa-aha baḍemme, antara ba haha-aha na am dáḡave á háye-aha keni tsaretse am sleḍe-aha-aatare, meḍaremeḍa ba estuwa.

²¹ Nálandze saḍaḍḍe a naba fantau ge puwa á sawa am samaya á sa arge emnde, ḍemḍemire á palle ba seke nákwá á uvera. Emnde baḍemme tá zlazla ba Dadaamiya adaba zlaḍa á nálandze ṅanna jauje ge ndzeḍa.

17

Elva a berni yaikke na ta fante zhera á

zawarire

¹ Am iga a una ɲanna maa, palle á malika-aha vuye na ndza ta tegaterem erba á masiba-aha am erva na a se ɗahite, a ba ɲane: Sawa náwa yá maraká zlaɗa na ni watse á shaná mukse záware ɲgelawa na. Amaana: Berni yaikke ta maganaa áte we á háye-aha gergere kwakya na.

² Duwa á slekse-aha á larde-aha baɗemme, ta de magaa gwardzire an mukse zaware ɲgelawa ɲanna, amá a ceɓaa emnde am duniya ba seke mbazla na karemka yawe ɗekiɗeki na. Estuwa, á ba elva á malika ɲanna.

³ Daaci a naba tsekwiyarhe ge Sheɗekwe Cufedɗe, daaci a naba eksite ge malika ɲanna, kwaye a diya á dem huɗe á kaamba. Ya naa ba mukse umele am kaamba ɲanna, a njeta áte iga á dabba, dabba ɲanna ba haɲɲe. Ire vuye á ba áte dabba ɲanna palle, derma-aha-aara kelaawa. Baɗemme a vuwa-aara, an puwa ba zhera-aha na zlayeka ɗekiɗeki na ge zláza Dadaamiya an ɲane.

⁴ Mukse na áte iga-aara na keni maa, á tsekwa am naɲgyuwe lefedɗe buwa. Naɲgyuwe-aha-aara ɲanna bukerɗe ba jili haɲɲe. Palle, haɲɲire-aara ba seke makala á iga a bere, amá palle na ba haɲɲe. Vuwa á mukse ɲanna baɗemme ba náza ɲgelawire: Kazlaɲa á dindar, antara naberasla, antara náza hyema zarizariya baɗemme, ira erba á dindar-aara a ɲanaahe am erva. Aɲkwa laakire an naha am erba-aara ɲanna. Duksa ɲanna wá, zawarire na a maganaa ɲane baɗemme na.

⁵ Aɲkwa zhera ta puwete áte wafke á mukse

ɲanna, amá elva am huɗe á elva. Ákyiye wá: «*Babila berni yaikke na wá, ɲane emmarge zaware-aha, antara shagerkire na tá maganá am duniya baɗemme.»

⁶ Ya naa mukse ɲanna ɗalanemɗála uzhe á emnde á Dadaamiya am ire, uzhe á emnde na shebarka elva a Yaisu na. Ba nanna-aaruwa, yá maga ba najipu-aara.

⁷ «Ká maga najipu á uwe ka,» a ba malika na á elvan ge iya, «naba effa ervaunɗe. Ankwa duksa palle yá kwaraksekwáre. Kwaye tara mukse ɲanna, antara dabba na á njá átekwa, antara ire-aha á dabba ɲanna vuye na, ira derma-aha kelaawa na, baɗemme yá ndaksendáhe názu am huɗe-aara.

⁸ Dabba ɲanna ka naaná ka na wá, ba dabba na ndza an shifa, amá kina ɓaaka na. Watse á sesse am evege shagerka na ɓaaka halavuwa-aara ɗekiɗeki na, amá á se haraaka kwakya mázle-aara, tá se keɗanaakeda shifa-aara baɗemme. Emnde a duniya na puwarteka zhera-aha-aatare am wakita á shifa daga am fakta á duniya na wá, itare watse tá maga najipu kwakya áte dabba ɲanna. Aɗaba werre, ndza ankwá an shifa, amá kina ɓaaka, aley watse á sesse zlaɓe áɗaliye.»

⁹ A biyántsa zlaɓe áɗaliye, a ba ɲane: «Duksa-aha na náwa ɲane na wá, sey á hyephye enkale á edda-aara lauktu á cenáncena. Ire-aha á dabba ɲanna vuye na wá, á mára egdzar wa-aha vuye na a njetaa mukse ɲanna atekwa na. Zlaɓe áɗaliye, á mára slekse-aha saɗaɗɗe vuye.

¹⁰ Ilyeɓe-aatare wá, daredde slekse-aha ɲanna.

Kina wá, unkwahire-aatare kina am sleksire. Amá una watse á sawa ge vuyire na á se haraaháre ba cekwa am sleksire nanna.

¹¹ Dabba nanna ndza ankwá, amá kina baaka na wá, ba nane an ire-aara una slekse ge tiisire, nane keni ba palle á slekse-aha nanna ta vuye na. Má watse sessa nane wá, tá se ba ekkedá ba dekideki.

¹² «Derma-aha kelaawa na ka nateraa ka na maa, itare tá mára slekse-aha kelaawa na watse tá sawa á katafke na. Má watse saremsa itare, Dadaamiya á de vaterte sarte ba cekwaangudi ge mága sleksire-aatare antara dabba nanna.

¹³ Slekse-aha kelaawa nanna wá, watse tá jema ye-aatare palle, sleksire-aatare bademme, watse tá maganán ba ge dabba nanna palle.

¹⁴ Itare bademme na, watse tá gwaare ba ge egdza zhel kyawe an wáva. Amá watse á de gáná ba egdza zhel kyáwe na ndzedá, tá antara emnde-aara na a dzeratersaa nane, a datersaa nane, tá ankwá á dabaná an ervaunde-aatare palle na. Á de gáná ba nane ndzedá, adaba nane Slekse arge slekse-aha bademme, Yaakadada arge dada-aha bademme.»

¹⁵ A biyántsa malika nanna zlahe adaliye, a ba nane wá: «Háye-aha nanna ka naaná ka, á njá mukse nanna áte itare na wá, á mára emnde a larde-aha gergere, emnde a jeba gergere, antara emnde a ndáhá elva-aha gergere bademme.

¹⁶ Derma-aha á dabba nanna kelaawa, antara ba dabba nanna an ire-aara, watse tá gwaare ge mukse záware na an degwune, watse tá zuze áte há-aara bademme, watse tá yana á ba an

ukhyiye dey. Ba hyuwa á vuwa-aara keni watse tá zuze, tá de zlanazle an kára ba defekideki-aara.

¹⁷ Adaba a maganaa ba Dadaamiya slera-aara am ervaunđe á slekse-aha ɲanna, ganakini tá ɲguda ye-aatare palle, tá maganá sleksire-aatare ba ge dabba ɲanna palle. Dadaamiya a magaa una ɲanna geni ta maganaamaga názena á kataná ɲane, dem sarte na má gevge názena a ndaasa ɲane.

¹⁸ «Mukse ɲanna ka naaná ka na wá, ɲane á mará berni yaikke. Bademme á slekse-aha na tá am duniya na tá á ba am sera-aara.»

18

*Palase na á de maganná Dadaamiya ge *Babila*

¹ Am iga a una ɲanna maa, yá zhára ba malika umele á tsekwa á sawa am samaya. Hákuma, antara demdemire-aara hyemhye am huđe á duniya bademme.

² Malika ɲanna a ketaa kwára-aara á ba an ndzedá, a ba ɲane: «Kina wá, zlauzle *Babila mázle-aara, á de mbedá berni yaikke. Daaci gevge tate á njá á shaitaine-aha, jini-aha, antara yiye-aha na ta shagerka-aha, wayarka emnde na tá njá am huđe-aara.

³ Adaba ɲane a ganve ire-aara ba seke mukse zaware, slekse-aha á duniya bademme ta naba magaa gwardzire an ɲane, zawarire-aara a cebaa emnde a larde bademme am duniya ba seke a cebateraa ba mbazla. Emnde a tsakala am duniya bademme garega nalmáne an mukse na,

adaba nane wayaawáyá za emtakire á duniya bademme.»

⁴ Daaci yá cena ba kwárá umele zlaɓe á daliye á sawa am samaya á ba an ndzedá, a ba nane: «Ekkure emnde-aaruwa bademme, sawesse am berni na! A ndefakurveka haypa-aatare, antara geni a sharkurka palase-aatare keni.

⁵ Adaba hyaahya haypa á berni nanna, de shanaasha Dadaamiya am samaya, shagerkire na tá maganá itare na á segasheka am ervaunɗe á Dadaamiya ba estuwa.

⁶ Sey tá magateránmaga palase ge emnde nanna ba seke una ndza ta magateranta itare ge emnde umele na. Baira a jaranuje ge una ni ndza ta magateranta itare ge emnde ma ser buwa keni. Ba ire keni a karanteka ge zlaɗa ba seke emnde na a cebateraa narge na.

⁷ Ba seke una nane zauze emtakire á duniya kwakya na wá, zlaɗa keni kwerawanaakwera á ba áte una nanna, magawantemága palasa ba shagera. Adaba a bántsa am ire-aara: Iya ganevka seke wegyegye a mukse, ya slekse ba iya an ire-aaruwa, á janjerma uwe antara kyuwa ba defikdefiki.

⁸ Adaba una nanna wá, sey tá se gwargwe masiba-aha sadafɗe ge berni nanna á ba áte háre palle. Tá se gwargwe tara lapikere, antara emtsa, ira waya, lauktu watse tá zlanazle an kára ba defikdefiki. Adaba Dadaamiya Yaakadada, sey ba nane palle an sleksire-aara ɓaaka umele, á de ndahaná ba nane názu tá maganá ge berni nanna.»

⁹ Má watse slekse-aha á duniya naránna yire

á kárá na á za berni ñanna wá, watse tá puwumpuwa erva am ire, tá tsaka dákwa, tá kyuwa gwardzire na ndza ta maganaa antara berni ñanna, ira emtakire á duniya na ndza ta nanaa itare áhuwa ñanna baðemme, adaba berni ñanna zauze kárá.

¹⁰ Kwaye watse tá tse yiyiye ge lyawa á zladá, tá ámbera fa hula: «Alawlawlaw! Baaka berni yaikke! Nja seke *Babila na ni shekwaaka ba ðekidfeke keni?»

¹¹ Ba estuwa ge emnde a tsakala na tá am duniya baðemme keni, tá de puwa ba erva am ire, tá de tsaka dákwa ge kyuwa berni ñanna, adaba ta baaka emnde a gáne-aatare.

¹² Adaba itare tá ankwá tsakala duksa kwakya áhuwa. Tá tsakala dindar, antara lipela, ira jeba á nákwá-aha umele ankwá gergere kwakya. Tá tsakala sandá-aha, lefedlefedfire-aatare ba seke uwe. Umele-aha-aatare jili hanje, hanjire-aara ba seke makala á iga a bere, umele wá, ba hanje. Zlabe adaliye, tá ankwá tsakala jeba á náfa-aha umele an dárádza jipu, antara egdzar duksa-aha na tá maganá an sláre á guwe, umele tá maganá an náfa na an dárádza jipu na, umele á duksa-aha ñanna tá maganá an verzhagane, umele íre danje, umele tá maganá an jeba á nákwá-aha umele ankwá an dárádza jipu.

¹³ Zlabe adaliye, tá ankwá tsakala názase gergere kwakya áhuwa: Umele yawe-aara, umele waye á gáná áte vuwa, umele tá dísaná am kárá ba seke kajiji, tá ankwá tsakala wáye á dále, antara nalkáme, antara ukpa-aara, ira mbazla. Tá ankwá tsakala esla-aha, kyáwe-aha, belsa-

aha, ira darkwa-aha, antara ba urimagwe keni: Náve-aha, antara emnde na tá halaterá áte we á wáwa. Baaka názu tsakalarka itare áhuwa. Adaba una ñanna tá kyuwa berni ñanna.

¹⁴ A ba itare: «Kina kazlaña zarizariya na ndza á kataná ervaunđe á ña na ba baaka mázle-aara? Kwakyire á nalmane á kure na, antara emtakire á duniya na ndza kwa zanaa kure na ba yakuránya kwá jammeka dƣekidƣeki?»

¹⁵ Baƣemme á emnde na tá tsakala berni ñanna wá, garege nalmána amkwa. Kwáye watse tá tse yiyiye ge lyáwa á zlaƣa, tá ámbera kyuwa, tá tsaka dákwa-aatare.

¹⁶ Watse tá ba: «Alawlawlaw baaka berni yaikke! Berni zariya na ndza á shakwa sanda-aha lefedlefedƣe na, jili haññe ba seke makala á iga a bere, umele ba haññe, tá an dárádza jipu, ira yaadi-aha umele zarizariya baƣemme, an dárádza jipu na. Baaka berni ñgelawa na an náza ñgelawire kwakya ázeñara, kazlaña a ñgelawire-aara, umele ta maganaa an dindar, umele ta maganaa an jeba á nákwá umele añkwa an dárádza jipu.

¹⁷ Baƣemme a dikele á duksa-aha ñanna shek-waaka dƣekidƣeki, keƣaakedƣa ba estuwa.»

Ba estuwa ge emnde a mága slera áte ire á háye keni. Emnde a báká paare á háye sadadƣe, antara male-aha-aatare, ira emnde a tsakala na tá maga shula an paare-aha á yawe, itare keni kwaye ta tsatsehe baƣemme yiyiye.

¹⁸ Ba ta puwete ice-aatare áte yire á kára na añkwa á zá berni ñanna wá, a ba itare: «Á jare áme kwa berni yaikke seke una mázle-aara!»

19 Ba ta ndaase una ɲanna wá, ta fantau ge kyuwa. Tá tsaka dákwa, tá slatsa erva, tá zá erva-aatare an sláre, tá puwa hula: «Alawlawlaw! Baaka berni yaikke! Baɗemme á emnde a paare á yáwe sadadsadadde na ta gaa nalmáne á ba áte ɲane na ba cekwaanɲudi keni shakwaaka degi!» A zluwa estuwa hula á emnde ɲanna.

20 Ekkure emnde na kwá am samaya, higauhiga arge keɗa á berni ɲanna. Ekkure emnde a bela á Dadaamiya, antara nabi-aha, ira emnde á Dadaamiya baɗemme, higauhiga arge keɗa á berni ɲanna. Adaba pelansepele Dadaamiya ge berni ɲanna názena ndza a magakurtaa ɲane na baɗemme.

21 Am iga a una ɲanna maa, yá zhára ba gwarda á malika umele, a eksante dada nákwá am erva, yaikkire-aara ba seke nákwá á uvera, a eblyanme á dem háye á ba an ndzeɗa, a ba ɲane: «*Babila berni yaikke na watse ba estuwa.

22 Baaka ura á de puwete ice áte emnde a mága gusa am Babila ɗekideki. Ma emnde a jaa gadzavera, ma emnde a ferta derma antara nalgaita, watse ba tseriiye baaka ura á de cena mágava á duksa am huɗe á Babila. Ma emnde a mága dzera, ma emnde a ndera gahe, ma emnde a haa hiya, baɗemme watse baaka ura á tse am zhegela ba palle keni.

23 Ekka Babila wá, baaka ura á de puwete ice áte kára á wáye ázena mázle-aara, baaka ura á de cena elva a gaa mukse, ma elva a de gaa zhele keni am mba á ɲa. Abi werre, ndza ta bántsa emnde a tsakala á ɲa: Sey ba ɲere ka mu ware

edda una á jañeruje na? Ta zlermu nalmáne á duniya bademme an kurguna. Adaba una ñanna mbedakmbedá na.»

²⁴ Zlafe ádalíye, Dadaamiya nanna uzhe á nabi-aha-aara, antara uzhe á emnde a d'aba ñane, bademme á ba am mbiye á Babila. Bademme a uzhe á emnde na ta cebateraa am duniya na, á ba am mbiye á berni ñanna baaka ura umele.

19

¹ Am iga a una ñanna maa, yá cena ba kwará á sawa am samaya, ba seke kwará á nalga yaikke hedihediye, a ba itare: «*Halailuya! Ba Dadaamiya á miya una slelya ura, edda á demdemire, hákuma bademme á ba am erva-aara.

² Adaba ñane á kya shairiya-aha-aara bademme á ba áte jirire áte uññule-aara bademme. Adaba una ñanna, maganánmaga palase ge mukse záware na a badzanve duniya bademme an gwardzire-aara, zlafe ádalíye, adaba a cebaa shifa á emnde a slera-aara na.»

³ A ba itare zlafe ádalíye: «*Halailuya! Kwaye yire á kára na á za berni ñanna shelle am zhegela, baaka emtsa-aara dem ba ge d'ekid'eki.»

⁴ Am iga a bela láhe-aatare maa, emgyegwar zála kul buwa ju ufáde, antara duksa-aha ufáde na tá an shifa na reppe puwaraapuwa á dem áhá á katafke á Dadaamiya am kurshi á sleksire-aara, tá an'kwa kezlan ugje. *Halailuya! *Aamin! a ba itare.

Edda una tá d'aháná an egdza zhel kyáwe na an'kwa á gá larusa-aara

⁵ Daaci yá cena ba kwárá umele á segashe am tate á kurshi á sleksire, a ba ñane: «Ekkure emnde á Dadaamiya bademme, an male-aha-ka, an egdzara-ka, bademme á kure kwa emnde na kwá an lyawa-aara am ervaunđe na, galaugálá Dadaamiya á miya.»

⁶ Zlabe ádaliye, yá cena ba kwárá umele ba seke kwárá á nalga, kwárá-aatare ba seke mága á yáwe áte guwa yaikke, zlabe ádaliye, ba seke válaha á samaya. A ba itare: «*Halailuya! Adaba Dadaamiya Yaakadada edda á hákuma bademme, Slekse ba ñane palle.

⁷ Higaumihiga bademme! Shamisha gedá yaikke! Galaumigálá Dadaamiya, adaba hye-phye sarte, ñwateñwa ñane geni egdza zhel kyawe á gá larusa-aara, larusa-aara ñanna keni maganaamaga niya.

⁸ Varanteva baráma ge larusa, geni á tsek-wemtsekwa nangyuwe lefedde jipu ámberá á maga pulpulire keni jipu, cudfedde zlabe ádaliye na.» Nangyuwe ñanna wá, á maramiya shagerire-aha na ndza ta maganaa emnde á Dadaamiya an ervaunđe-aatare palle na.

⁹ Daaci a ba malika na á elvan ge iya: «Puwetepuwa elva na náwa yá ndakndáha na am wakita: Má ba gedá wá, watse ankwá áza emnde na dhaterdáha Dadaamiya á dem lariusire á egdza zhel kyawe na.» A farhe zlabe ádaliye, a ba ñane: «Baaka fida am elva na dekideki, a ndaasa ba Dadaamiya an we-aara.»

¹⁰ Daaci, ya gaavehe am sera-aara, yá kátá kezlan ugje, amá a naba piyite: «Manka una,»

á bina. «Iya keni ya ba sleslera á Dadaamiya ba seke kure antara egdzar mama-aha á ña na fakurtarefe áte elva a Yaisu na. Kezlankezla ugje ba ge Dadaamiya palle.»

Elva a Yaisu na wá, ba elva na ndza a baternaa Shedekwe Cufedde ge nabi-aha, lauktu ta se balaterán ge emnde na.

Zhele midala áte belsa dzayye

¹¹ Am iga-aara maa, ya ketaa ice á dem zhegela wá, yá zhárá ba samaya wanje an wacene. Zlaɓe ádaliye, yá zhárá ba belsa dzayye telle, antara ura áte iga-aara. Zhera á edda una ñanna: Slejirire, antara baaka fida ázeñára. Ñane á kya shairiya-aara á ba áte jirire, á wawa keni á ba áte unjule-aara.

¹² Ice-aha-aara ba seke nara á kárá, dzakwa á sleksire keni baaka zlakta-aara am ire-aara. Zlaɓe ádaliye, anjwa zhera an puwa áte ñane, baaka slediyeddiye dekideki, sey ba ñane palle duksa-aara.

¹³ Nanjyuwe-aara bademme ba uzhe. Zhera-aara wá: Elva á Dadaamiya.

¹⁴ Am iga-aara, ta dɓabemhe ge emnde a wáva am samaya, itare keni bademme tá á ba áte belsa dzaydzaye, tá am nanjyuwe keni dzayye ba telle, lefedde jipu, cufedde zlaɓe ádaliye keni.

¹⁵ Anjwa á segashe katsakar am mbuwe-aara, an ga slare jipu. Á de gáná an una ñanna ndzedá arge duniya bademme. Ba ñane palle una á de geva slekse an zade á ire am erva, slekse na an hakuma jipu na. Watse á ngerda kelaade-aha-aara an sera ba seke una tá ngerda egdzara á náfa am tate-aara, ge beca yáwe-aara na. Una

ɲanna, á maramiya já ervaunɗe á Dadaamiya Yaakadada árge duksa bademme.

¹⁶ Anƙwa zhera-aara an puwa áte nanɗyuwe-aara, antara pákwálá-aara, a ba itare: Slekse arge slekse-aha bademme, Yaakadada arge dada-aha bademme.

¹⁷ Daaci yá zhárá ba malika umele a tsanve ge vaciya, a fantau ge dáha yiye-aha tá anƙwa ɲgye am huɗe á zhegela, herzha á shanaasha samaya bademme na, a ba ɲane á ba an ndzedfa, á elvan ge yiye-aha ɲanna: «Sawmbare bademme ásehuna, náwa Dadaamiya a gyakur muɲri yaikke!

¹⁸ Sawmbare á se za hyuwa á slekse-aha á larde-aha, antara hyuwa á sawji-aha, antara male-aha-aatare, hyuwa á belsa-aha, antara emnde na ndza tá áte belsa-aha ɲanna, hyuwa á náve-aha antara emnde na tá kwárá ire-aatare, hyuwa á male-aha, antara egdzara, hyuwa á emnde bademme, sawmbare zauza.»

¹⁹ Daaci yá zhárá ba dabba na, antara slekse-aha á larde-aha, ira sawji-aha-aatare, jarammeje bademme ganakini tá daná wáva ge edda una áte belsa dzayye na antara emnde a wáva-aara.

²⁰ Daaci ta puwatersaa erva ákataliya ge tara dabba ɲanna, antara nabi fida na ndza a magaa najipu-aha á katafke á dabba ɲanna. Ndza a badu emnde á ba an najipu-aha ɲanna, ta lyevaa lámbe á dabba ɲanna, ta kezlan ugje ge gáráva-aara hele na. Daaci ta valyateremhe á ba an shifa emnde buwa ɲanna á dem derve á kárá, an wesha an *baraudau, jauje ge kárá-aha bademme.

²¹ Amá sawji-aha-aatare, antara emnde na tá am iga á dabba ɲanna bademme na wá, a cebateraa ba katsakar na á segashe am mbuwe á edda una áte belsa na. Yiye-aha bademme zaruze hyuwa-aatare, ta yanaa ba itare.

20

Elva a zara sleksire am iva debu

¹ Am iga-aara wá, yá zhárá ba malika umele zlaɓe ádaliye, á tsekwa á sawa am samaya, an egdza a tsekweram am erva, ge se wera evege shagerka na ɓaaka halawuwa á sladɗfire-aara dekiɗeki na, antara tsavaytsavaye yaikke.

² Daaci a naba eksavaa náza nye na emgyegwe a záhe keni ba ɲane na. Amaana: Male á jini-aha, bi Shaitaine. Daaci a naba ɲgudanaahe ciyye ge malika ɲanna, geni á gá iva debu am tsavaytsavaye ɲanna.

³ Kwaye a de eblyanme am evege ɲanna, a zlenɗa an egdza a tsekweram, a venyanuhe zlaɓe ádaliye geni á gá iva-aha na am huɗe-aara, á shanka se bada emnde am duniya mázle-aara. Sey má zlauzle iva debu ɲanna, lauktu tá de belanaabela cekwaanɗuɗi.

⁴ Am iga a una ɲanna maa, yá zhárá kurshi-aha á sleksire, emnde tá aɲkwa á njanja am kurshi-aha ɲanna, ta vaterte hákuma á kya shairiya ge itare. Zlaɓe ádaliye, ya náternaa shedeke-aha á emnde umele, ndza ta cebáteraa aɗabá tsaraatse áte elva a Yaisu, tá aɲkwa ndater elva á Dadaamiya ge emnde. Itare ndza kezlaranka ugje ge dabba ɲanna dekiɗeki, ma ge gáráva á dabba ɲanna keni. Lyiyarka

lám̄ba á dabba ṅanna ɔ́kideki ma áte erva a nadafa-aatare, ma áte wafke-aatare keni. Ya naternaa emnde tá á ba an shifa-aha-aatare zlaɓe ádaliye laṅṅe, tá aṅkwa zá sleksire-aatare antara Yaisu *Almasiihu am iva debu.

⁵ Una wá, zuṅṅwire á tseta emnde am fáyá. Emnde umele maa, zlaɓe tá tseteka emtsaáɔe, sey má zlauzle iva debu ṅanna.

⁶ Má geɔa wá, sharánsha emnde ṅanna Dadaamiya a tsaterɔe zuṅṅwe am fáyá na. Tá de jammeka antara emtsa na watse á de ceba emnde ge buwire na ɔ́kideki, itare watse tá de geva *liman-aha á Dadaamiya, antara Yaisu Almasiihu, tá de za sleksire-aatare antara Yaisu Almasiihu am iva debu.

Halavuhále ndzeɔa á Shaitaine

⁷ Am iga á iva debu ṅanna maa, watse tá belanaabelá zlaɓe ádaliye Shaitaine, á de sesse am evege-aara ṅanna.

⁸ Watse á de bada emnde zlaɓe ádaliye am larde-aha baɔem̄me am duniya. Ba larde-aha ṅanna una tá dahaná an Gaug, antara Magaug na. Watse á jatermaare baɔem̄me, ganakini tá de wawa. Kwakyire-aatare, watse ta ba seke shiili na am guwa na.

⁹ Daaci yá zhára ba daredde, tá kela á dem huɔe á duniya baɔem̄me, tá aṅkwa á jantaave ge tate-aha na tá átekwa emnde á Dadaamiya, tá jantaave ge berni yaikke na a wayeta ervaunɔe-aara ba estuwa. A naba tsekwa ge kára á sa am samaya, a se zlateraahe baɔem̄me.

¹⁰ Daaci ta eksevaa Shaitaine na a keɔeteraa ṅane na, ta de eblyanme am derve á kára na

an wesha an *baraudau, tá am huđe-aara tara dabba, antara nabi fida na. Tá de maga palása-aatare áhuwa vayi vacika dem ba ge đekideki.

Shairiya á emnde am halavuwa á duniya

¹¹ Daaci yá zhára ba kurshi á sleksire yaikke vayvaya, dzayye ba telle, aᅅkwa ura á njá am kurshi ᅅanna. Tara samaya antara haha zhagadarzhagade á katafke-aara, puwarteka ice áte itare đekideki.

¹² Daaci yá zhára ba nalga á emnde na ndza emtsaremtsa na, male-aha, antara egdzara bademme tá aᅅkwa á tsaatse á katafke á slekse yaikke ᅅanna. Daaci ta naba warta wakita-aha. Aᅅkwa wakita umele, an puwa zhara-aha á emnde na tá an shifa na á zleka na am huđe-aara, ᅅane keni ta werantehe. Daaci Dadaamiya a fantau ge kya shairiya á emnde a fáyá ᅅanna bademme, ma shairiya á ware keni ta kyánaa á ba áte názena ndza a maganaa edda-aara, ta beranaa am wakita na.

¹³ Antara ba emnde na ndza ndaterunde háye keni, a naba melatersehe á segashe. Tara emtsa, antara fáyá keni eptsananaaptsa emnde na ndza tá ázetare, Dadaamiya a se kya shairiya-aatare bademme, ma ware keni ta kyanaa á ba áte názena ndza a maganaa edda-aara na.

¹⁴ Am iga-aara maa, ta puwum tara emtsa, antara fáyá á dem kára. Derve á kára ᅅanna emtsa umele ge buwire.

¹⁵ Daaci ma ware una shanka zhara-aara am wakita á emnde a shifa na wá, ᅅane tá velyaná á ba á dem derve á kára.

21

Samaya antara haha bukerde tá áŋwaslire

¹ Daaci yá zhárá ba samaya áŋwaslire, antara haha áŋwaslire, emgyegwe-aha-aara na medarmeda bademme. Ba háye-aha keni ta baaka medarmeda bademme.

² Zlabe ádaliye, yá zhárá ba berni cufedde. Una ŋanna, berni á Urusaliima áŋwaslire, aŋkwa á tsekwa á sawa áza Dadaamiya am samaya. Dadaamiya a cadese ba seke una ni larusa á cada vuwa-aara má aŋkwa á zlálá á de gá zhele na.

³ Yá cena ba kwárá yaikke, an ndzedfa jipu, á segashe am tate á kurshi á sleksire. A ba kwárá ŋanna wá: «Kina wá, tate á njá á Dadaamiya á ba am dágave á emnde mázle-aara, tá de geva emnde-aara ba miyenne, Dadaamiya keni á njá á ba am dágave-aatare, á de geva ba ŋane palle Dadaamiya-aatare.

⁴ Á de halatersá ba ŋane an erva-aara yáwe á kyuwa am ice. Watse baaka á de emtsa mázle-aara. Ma kyuwa, ma tsáká dákwa, ma wá á vuwa keni bademme duksa-aha ŋanna ndza na á dedde.»

⁵ Daaci á ba Slekse yaikke na am kurshi na: «Ka cenáncena emtu, duksa bademme sey yá maga ba umele áŋwaslire.» A fiyarhe zlabe ádaliye, a ba ŋane: «Puwetepuwa elva ŋanna, adaba jirire baaka fida am hudfe-aara dekideki.»

⁶ A farhe zlabe ádaliye ge enndáhá-aara, a ba ŋane wá: «Zlauzle áte una. Ba iya una ya zuŋŋwe arge duksa bademme, watse

ba iya ɲanna zlaɓe ádaliye am halawuwa á duksa baɗemme. Ya slekatafke keni ba iya, ya slekataliya keni ba iya. Ma á wáná ndera ge ware keni, yá vanteva ya yáwe á shushe ge edda-aara ba dey. Yáwe ɲanna, yáwe á suwa na á fá shifa am ura na.

⁷ Daaci ma a ganaa ware ndzedá keni yá vanteva duksa-aha ɲanna. Iya keni yá gevge Dadaamiya-aara, ɲane keni á gevge ba egdza-aaruwa.

⁸ Amá tara emnde a lyáwa, emnde na fartareka, emnde a mága danɲwire á huɗe, emnde a ceɓa shifa, emnde a mága gwardzire, emnde a kyula hele, antara emnde a mága fida, emnde ɲanna baɗemme tá de ɲgyakaterá á dem derve á kára na an wesha an *baraudau na. Una ɲanna, emtsa-aatare ge buwire.»

Elva a Urusaliima áɲwaslire

⁹ Daaci malika-aha vuye na ndza tá an erba-aha vuye am erva-aatare, an naha an masiba-aha na á halawuwa átekwa na, palle-aatare a naba ɗahite, a ba ɲane á elvan ge iya wá: «Sawa náwa yá maraká larusa á gáná egdza zhel kyáwe na.»

¹⁰ Daaci a naba tsekwiyarhe ge Sheɗekwe Cudɗɗe, kertenj a naba eksite ge malika ɲanna, kwáye a de ɗalta antara iya áte ire á wa sladɗe jipu, a mariya berni cudɗɗe, berni á Urusaliima anƙwa á tsekwa á sawa áza Dadaamiya á sawa am samaya.

¹¹ Berni ɲanna ámbera á maga wulwulire ba seke jeba á náƙwa umele anƙwa tá ɗaháná an Yaspá, an ɗárádza jipu. Wulwulire ɲanna á maganá ba demɗemire á Dadaamiya.

¹² Ta jantaave ge berni ɲanna an riya yaikke, an sladɗire á dem zhegela keni ɲane. Wákyiya kelaawa ju buwa áte riya ɲanna. Malika-aha keni ta kelaawa ju buwa áte wakyiya-aha ɲanna. An puwa zhera-aha á jeba-aha á *Iserayiila-aha kelaawa ju buwa na áte wákyiya-aha ɲanna bademme.

¹³ Wákyiya keye keye áte dalbe-aha á riya ɲanna ufade kerde. Wákyiya keye á dem gedí, keye á dem manem, keye á dem pute, keye keni á dem yala.

¹⁴ Riya á berni ɲanna bademme ta fanaa ekte á ba an nákwá-aha kelaawa ju buwa njanɲe. Ba kelaa nákwá am nákwá-aha ɲanna, an puwa zhera á ura palle am pukura-aha á egdza zhel kyáwe ta kelaawa ju buwa na.

¹⁵ Malika ɲanna a ndahi elva na, an zade á dindar sladɗe am erwa-aara ge kura duksa an ɲane. Á de kura ba tara berni ɲanna an ɲane, antara riya-aha-aara, ira wákyiya-aha-aara bademme.

¹⁶ Berni ɲanna wá, gevka takarre. Daaci malika ɲanna a kuranaahe, dalbe-aha-aara ufade kerde ba kalkale. Ma am sladɗire, ma am hwiya keni ba zawa debu kelaawa ju buwa. An wálá á dem zhegela keni ba estuwa.

¹⁷ Daaci a kurese riya-aara keni. Wálá á riya ɲanna deremke, an kul ufade ju ufade áte erwa. Una ɲanna wá, a kuran ba seke kura duksa á emnde.

¹⁸ Riya á berni ɲanna bademme wá, ta nyaɲanaa á ba an jeba á nákwá umele aɲkwá tá dɗaháná an Yaspa, nákwá ɲanna an dárádza jipu.

Berni ɲanna maa, baɗemme ta nderanaa á ba an dindar miyenne, ɗáláwwe ba seke kweteram.

¹⁹ Nákwá-aha na ta fanaa ekte ge riya ɲanna maa, baɗemme an cáɗá. Ta caɗanaa an jeba á nákwá-aha umele aɲkwa tá an ɗáráɗza jipu, nákwá-aha ɲanna jeli gergere baɗemme. Zunɲwire á nákwá-aha á ekte á riya ɲanna, ta caɗanaa an Yaspa, buwire, ta caɗanaa an Safira, keyire, ta caɗanaa an Kaldaidaun, ufaɗire ta caɗanaa an Imiradi,

²⁰ ilyebire ta caɗanaa an Sardunisu, uɲkwahire ta caɗanaa an Sardiyus, vuyire ta caɗanaa an Kirisauliti, tiisire ta caɗanaa an Bairil, ɲane jeli slerekke. Maselmanire tá caɗanaa an Tupas, kelaawire ta caɗanaa an Kirisauparasu, kelaawa jemtekwire ta caɗanaa an Turkuwas, ɲane jeli lipela. Kelaawa ju buwire ta caɗanaa an Amaitistu.

²¹ Amá wákyiya-aha kelaawa ju buwa na áte riya á berni ɲanna, ta fafanu ba jeba á nákwá umele aɲkwa zariya jipu ákura paare, amá heɗaaka. Ba kelaa wákyiya ta fanu nákwá ɲanna palle. Baráma am huɗe á berni ɲanna wá, ba dindar miyenne, ɗáláwwe ba seke kweteram.

²² Puwanteka ice-aaruwa ɗekideki áte mashidi am berni ɲanna, aɗaba Dadaamiya Yaakadada, antara egɗza zhel kyawe tá aɲkwa am huɗe-aara. Aɗaba una ɲanna baaka mashidi na.

²³ Tara vaciya antara tere keni ta baaka ɗekideki. Aɗaba ɗemɗemire á Dadaamiya hyephye, Eɗza zhel kyáwe keni aɲkwa á mára parakkire-aara am huɗe á berni ɲanna

baɗemme.

²⁴ Emnde na ndza tá am duniya, tá am berni ɲanna, tá aɲkwa já dába á ba áte parakkire ɲanna. Emnde na ndza ta slekse-aha am duniya na keni, halarantehálá sleksire-aatare ɲanna á dem huɗe-aara.

²⁵ Wákyiya-aha áte riya á berni ɲanna tá heɗeka ɗekideki, á njá á ba an wácene, aɗaba baaka vayiya mázla-aara.

²⁶ Sleksire, antara duksa shagera na ndza am duniya na, watse baɗemme tá de ndakaná á ba am berni ɲanna.

²⁷ Baɗemme á názena aɲkwa harám am huɗe-aara maa, á demka á dem berni ɲanna ɗekideki. Emnde a mága názu zlayeka, antara emnde a fida wá, baaka baráma ge itare ɗekideki á dem huɗe-aara, sey ba emnde na an puwa zhera-aha-aatare am wakita á emnde a shifa na á zleka na, wakita á egdza zhel kyáwe na. Sey ba itare palle una watse tá dehuwa.

22

¹ Daaci malika ɲanna a naba mariya guwa, aɲkwa á kelá yáwe á shifa átekwa, aɲkwa á maga wulwulire ba seke kweteram. Yáwe ɲanna, á kela á sawa am tate na tá átekwa tara Dadaamiya tá am kurshi á sleksire-aatare antara egdza zhel kyáwe.

² Daaci yáwe ɲanna á kelá á ba áte baráma am huɗe á berni ɲanna. Aɲkwa náfá á shifa áte we á guwa ɲanna, áte iga guwa ɲanna, antara ásehuna-aara keni ba ɲane. Náfá á yá egdzere ser kelaawa ju buwa áte iva palle. Ba kelaa tere,

á yá ba egdzere. Hyema-aara keni kurgune ge emnde na ta sawa á sa am larde-aha am duniya na.

³ Baɗemme á názena a nyainyanvaa Dadaamiya á taa demka á dem berni ɗanna ɗekiɗeki.

Tara Dadaamiya, antara egdza zhel kyáwe tá aɗkwa á njanja am kurshi á sleksire am berni ɗanna. Emnde a slera-aara tá aɗkwa kezlan ugje ge ɗane.

⁴ Itare wá, tá de nanna wafke á Dadaamiya ba shagera, watse tá shá zhera-aara áte wafke-aha-aatare baɗemme.

⁵ Vayiye wá, watse baaka ɗekiɗeki, watse baaka wedere á parakkire umele ɗekiɗeki, ma kára á wáye, ma vaciya keni. Aɗaba ba Dadaamiya Yaakadada an ire-aara una á de geva parakkire na á hyetehye áte emnde baɗemme. Daaci tá de zá sleksire-aatare emnde dem ba ge ɗekiɗeki.

Yaisu aɗkwa á eptsá

⁶ Daaci a ba malika á elvan ge iya: «Elva-aha na wá, baɗemme ba jirire, baaka fida am huɗe-aara ɗekiɗeki. Ba Dadaamiya una ndza a vaterte Shedekewe-aara ge nabi-aha, zlaɓe ádaliye, a belaa malika-aara ge emnde a slera-aara, ge se maraterá názu herzhe watse á magava ba jirire na.» A zla elva-aara estuwa.

⁷ «Ya baa ba kure! Náwa herzhe yá aɗkwa duwa, yá de gefatertegedá emnde na má tsu-fartetsufa elva a nabiyire na am huɗe á wakita na.»

⁸ Iya Yuhanna wá, ya cenanaa á ba an hyema-aaruwa duksa-aha ñanna, ya nanna an ice-aaruwa. Am sarte na cenanvaacena, zharannaazhárá duksa-aha ñanna ba shagera, kreppe ya naba mbedehe am sera á malika na a mariyaa duksa-aha ñanna, yá kezlan ugje.

⁹ Amá a naba piyite: «Mañka una,» a ba ñane á elvan ge iya. «Iya keni ya ba sleslera á Dadaamiya ba seke kure antara egdzara mama-aha á ña nabi-aha umele. Ya ba seke emnde na ta de d̄aba názena ka puweta ka kina an ervaun̄de-aatare baðemme. Kezlankezla ugje ba ge Dadaamiya palle.»

¹⁰ Názu a binaa ñane zlaɓe áɗaliye, a ba ñane: «Elva-aha na wá, a tsekwanaa ba Dadaamiya. Shebatervuweka elva-aha ñanna ge emnde. Adaba herzhe watse á magava duksa-aha ñanna.

¹¹ Názu yá bakurná ya wá: Má ura a eksese mága kelaadire, a naba emmága ñane. Edda una a eksese mága harám, a naba emmága ñane. Edda una ñane a eksese mága maggwire, a yanka emmága-aara. Edda una ñane a eksese mága cufed̄d̄ire, a yanka, a emmága cufed̄d̄ire.»

¹² A ba Yaisu: «Náwa herzhe yá añkwa duwa antara láɗá-aaruwa am erva yá de tegakurtega. Amá wá, ma ware keni yá de vanta á ba áte názena ndza a maganaa edda-aara.

¹³ Ba iya una ya zun̄ñwe arge duksa baðemme, am halavuwa á duksa baðemme keni ba iya ñanna zlaɓe áɗaliye. Ya slekatafke keni ba iya, ya slekataliya keni ba iya.»

¹⁴ Má ba gefa wá, watse tá shansha ba emnde na tá yanka liya am nanɗgyuwe-aatare defekideki na. Itare wá, watse tá shansha baráma á dem berni, tá de zá egdza á náfá á shifa na ba seke una tá kataná itare.

¹⁵ Amá emnde a mága ngudiyire, antara emnde a mága náfá, emnde a mága gwardzire, emnde a ceba shifa, an emnde a mága hele, ira emnde na tá njá á ba an fida am mbuwe na, emnde ɗanna bademme wá, itare tá taa demka á dem berni ɗanna defekideki.

¹⁶ «Iya Yaisu, ya belakuraa malika-aaruwa, ganakini á de balakursebáale duksa-aha ɗanna bademme ge kure aiklasiya-aha. Ya wulfe á *Dawuda ɗará ba iya, ya terlyakwa á ireɗlya keni ba iya.»

¹⁷ Daaci a ba tara Shedekwe Cufedde, antara larusa á egdza zhel kyáwe: «Ane! naba sawa». Ma a cenanaa ware keni, ɗane keni a bánba: «Sawa». Ma á wáná ndera ge ware keni, sawmbare shawushe yáwe á shifa. Ma a se katanaa ware yáwe ɗanna keni, tá vante ba dey.

Elva na am halavuwa á elva-aha

¹⁸ Iya Yuhanna wá, náwa yá aɗkwa fater magiya ge emnde na tá aɗkwa cená elva á nabiyire am wakita na: Ma ware una a far názá-aara ge názena am wakita na keni, Dadaamiya á de fanaarfe ge ɗane masiba-aha ɗanna á ndahaná wakita na.

¹⁹ Ma ware una a gulese elva a nabiyire na am huɗe á wakita na keni, Dadaamiya á de tsakese dza-aara am egdzara á náfá á shifa aɗkwa an puwa am wakita na. Watse baaka slede á

edda-aara ba dɛkideki am berni cufedɛde na á ndahaná wakita na.

²⁰ A bántsa edda una a magaa seydire á ba an jirire áte elva-aha ɲanna bademme na: «Ba jirire, náwa yá á ba áte we á sera, yá anƙwa duwa.»

*Aamin! Naba sawa ka Yaakadada Yaisu!

²¹ Yaakadada Yaisu a hyantehye ɲgurna-aara ma áte ware keni bademme.

Wakita á Dadaamiya
La Bible en wandala

copyright © 1999 Wycliffe Bible Translators, Inc.

Language: (Wandala)

Contributor: Wycliffe Bible Translators, Inc.

All rights reserved.

2020-12-01

PDF generated using Haiola and XeLaTeX on 25 Aug 2024 from source
files dated 29 Jan 2022

dec75dd5-4784-5059-aa00-668d508a6b0d